

HEBREOS

Yi Necy Huidi Pinjaty Yajniguejx Je Hebreo jäy

1 Jecy'ajty Dios ayuc yecy ma ajt nmij'ap nmijteedy canaag'oc etz canaagnax miid je yprofetas ajcxy, je' ajcxy huidibi najtzcapxiy Dios y'ayuc. ²E jadachambi ma xii tiempo yhuingooni co je naaxhuiñybi ycixani, Dios ayuc yecy ma iich ajt miid je' y'ung. Dios miid y'ung yaj'oyiyy je naaxhuiñybi etz tüg'óciy tijaty huidibi yajpatp. E Dios ti y'ung yajmigo'ixmadziydäy tüg'óciy. ³Dios y'ung ymiid Dios y'oy'ájtín, yi' je' Dios ytiicxin'ajtpy yjajin'ajtpy. Yi' je' codinaayb etz yajniguëxigy nej je' je Dios. Dios y'ung huijtz'ijtaayb tüg'óciy miid je' y'ayuc etz ane'mín mic'ajt miidpi. Co Dios y'ung ti xyajhuaatzim ajt nbocy, chi cöbijcy je mij'ane'mín jiiby tzajpjoty, jadu'n nej jihuiy y'ixtacy a'oy'amy ma je mijpi Dios ymijc jiiby tzajpjoty.

**Dios y'ung jacmij yi'ca'ydi
ángeles ajcxy**

⁴Je Dios y'ung jac mij je' ymic'ajt y'ane'mín miidity, ca'ydi je ángeles ajcxy. Com yi' je' Dios y'ung, paady ycixpi mic'ajt miidity jaydëbi

ane'my huidibi Dios yje'ajtpy, e ca'ydi yi ángeles ajcxy yi jadu'mbi mic'ajt miid. ⁵Com Dios ca' yi' ni tüg ángel nimay:

iich miich n'ung'ajtpy. iich
miich ti nyajpi'c'aty
jadachambi xii.

Nañ jadu'n ca' Dios ni tüg ángel nimay:

Miich xyteedy'adiibich, iich
miich n'ung'adiiyb.

⁶Co Dios y'ungoob oy quexy ma naaxhuiñyäj chinäy, chi yi' ane'mín pidacy:

Huen je ángeles ajcxy nidüg'óciy
huindzigihuipy pa'tjihuihuipy
je' y'ung.

⁷E miid je ángeles ycixpi, Dios yminañ:

Yi ángeles jadu'n yi' ajcxy nej
poj. Yi' ajcxy huidibi tzajpjoty
tzinaayb, jadu'n yi'ajcxy nej
huidzuc, nej jiinye'n.

⁸Jadu'n Dios yminañ miid y'ung ycixpi:

Miich, Dios'ajtp, miich
m'ane'mín huinixii
huinitiendo yi' y'idipy.
Miid mdudägy'ajtin miich
m'ane'mipy.

⁹ Ti mdzocy je tiy'ajt tiybi, e ca' ti m'ixa'n je jibicpi. Paady ycixpi Dios, miich mDios, ti xyhuin'ixy, e ti yejctäy nigi ma miich je jotcuje'ajtin je xondaacin, ca'ydi ma yi mmi'ane'mbidijc.

¹⁰ Dios nañ jadu'n ymina'n:

Miich, Huindzin Dios, oga'n'aty mbidac nej naaxhuiñybi chondacy, e miid miich mmic'ajt myaj'oyi'y je tzajp.

¹¹ Cijxtähuip yi naaxhuiñybi etz yi tzajp, per miich hui'mip huinixi huinitiempo. Jadu'n yi naaxhuiñybi etz yi tzajp y'amijiydähuipy nej huit.

¹² Jadu'n miich yi naaxhuiñybi etz yi tzajp m'anëgipy nej tüg huit yaj'anëgyin. Jadu'n miich yi naaxhuiñybi etz yi tzajp myajtigadzipy nej jäy ajcxy yajtigach y huit. Chi miich je'n'i m'idipy, je mxii mjimijit ni mina ycacixipy ycatigoyipy.

¹³ Ni camina Dios canimay ni tüg je ángeles ajcxy:

İña' ma iich nmijc a'oy'amy, ixti mabaad iich miich je mmidzip nmimadactäyich, jadu'n yi'ajcxy nipaadipy nej yi' miich mdecypocxpejt'adyii.

¹⁴ Tüg'ócüy je ángeles ajcxy ac espíritu yi' ajcxy, e ytungixy ma Dios, yquexyöygixy jigix pubedipy je jäy ajcxy huidibi ajcxy y'alma padam ñidzoocin.

Ca' n'ijxnajx nmidonajxim nigoo yi pocyhuinmeecxin

2 Miid jadayaabi tiy'ajt ycixpi, oy co yajxon n'ocjäygugi'yim Dios ytiy'ajt huidibi ti nmidoohuim,

jigix ca' njijpyöyduutim je Dios ytiy'ajt huidibi jadu'n nipatp nej tü'aa oybi. ² Pen je ayuc tiy'ajt huidibi ángeles ajcxy yejc jecy'ajty, hui'm je' co yjanchity. E pinjaty pocytumb, e ca' cuyduuni Dios ytiy'ajt, Dios chaachytunipy je' nej padyii miid ypocy ycixpi.

³ ¿Nej tijy iich ajt co Dios ycastigo nga'ocpaatim, pen je' je' yam ca' nmijpidaacim je Dios ytiy'ajt jadu'n nej jëbi xyajnidzoocim ajt n'alma? Yi Huindzin Jesús jayijp'aty ci'm nigapxy Dios ytiy'ajt jadu'n nej jëbi Dios xyajnidzoocim ajt n'alma. E jac'axam je discípulos ajcxy nañ jadu'n najtzcaxiy Jesús y'ayuc, e nigapxpejty ajcxy co yjanchity je Jesús y'ayuc, e chi capxnajxy ajcxy jada tiy'ajt ma iich ajt. ⁴ Jadu'n anajty capxhuäxcixy Jesús y'ayuc ma iich ajt, chi Dios yajniguëxcip Jesús y'ayuc co yjanchity co tuñ ijxpejt, mijhuinma'n etz milagro. E co Dios xymooyim je yijhui'n ymic'ajt, chi nije' nije' nbaatim mic'ajt ma Dios. E jadu'n Dios tuñ nej yi' tzocy.

Jesucristo jadu'n je' anajty nej ajcxy yjuugy ymigüg

⁵ Dios ca' yi ángeles ajcxy ti cötujcin möy co y'ane'mity ya naaxhuiñ, jadu'n nej xii tiempo min cidägy, je xii je tiempo huidibi iich ajt nnimi'ydaacim. ⁶ Hue' janchtiy ji tüg'it yjaybetyity ma Dios ñecy, ma ymina'n:

Miich Dios, çti yi' je naaxhuiñyjäy, co miich yi' ajcxy mjäymedziyb? ¿Ti yi' je naaxhuiñyjäy, co miich je' ajcxy mjotmay'adyii?

⁷ Janch con xii tiempo miich ti mmöy yi naaxhuiñjây ajcxy e nañ ti mmöy jacminacy ymic'ajt y'ane'm'ajt ca'ydi yi ángeles ajcxy. Per jac'axam miich mmöhuañ naaxhuiñjây ajcxy nīgi ymic'ajt y'ane'm'ajt, ca'ydi je ángeles ajcxy. Tüg'óciy huidijaty miich ti myaj'oyi anajty ti mbidactähuip yi' ma yi naaxhuiñjây ajcxy ane'min.

⁸ E co anajty ti mbidactäy anajty ma yi' ajcxy y'ane'min, jadu'n nipaady nej jihuïy tüg'óciy tijaty huidibi ti myaj'oyi, y'idipy ma yi' ajcxy ytecypa't.

E jadu'n yi', co Dios moyday ane'min je Cristo. Dios ni ti yi' ca'ixmach nicxy yca'ity ma yi' y'ane'min. Oy ixipy ca'ni cham n'ijxim co tüg'óciy tijaty ya naaxhuiñ etz tzajpjoty ca'ni amugi' ycapxycöbigy. ⁹ Dios ti xyaj'ijxim co Jesús miid mij'ajt ane'm'ajt. Je ángeles ajcxy nīgi mic'ajt oy'ajt anajty miidity, ca'ydi Jesús co yi' chinay ya naaxhuiñ. Jadu'n Dios tuñ jaydēbi Jesús y'ögy miid jây ajcxy ypocy ycixpi. Jadachambi Dios ti möy Jesús mij oy'ajtin, etz mij ooy ti cömay miid je tzaachy'o'cin huidibi ypaat.

¹⁰ Tüg'óciy huidijaty ya yajpatp, ji'ajtp yi' miid Dios ycixpi etz Dios ymic'ajt yaj'ijtaayb tüg'óciy huidibi ji'ajtp. Dios tudägy ytuuñ co yajca'pxi Jesucristo y'oy'ajtin miid je tzaachypi huidibi ti minaxy ti yajnaxy. Miid co Jesucristo tzaachypi ti minaxy ti yajnaxy, paady ycixp jây ajcxy padaangixy

Cristo y'oy'ajtin. ¹¹ Miid co Jesucristo, je huidibi jây ajcxy yajpocyñhuaatzp, jiiby mic'ajt ti paady ma Dios Teedy, paady ycixp yi' ajcxy huidibi patcixp pocyñhuaatzin nañ jim mic'ajt patcixy ma Dios Teedy. E miid co Jesucristo etz yi' yjây mic'ajt patcixy ma Dios Teedy, paady ycixp Dios y'ung je Jesucristo ca' ti tzo'ydu'n jihuïy co yi' ymina'ñ co je mibijcpidiyc jadu'n nipaady nej yi' yjugytijc ymigügtijc. ¹² Paady je Cristo ymina'ñ ma yjaybetyity:

Miich Dios, iich miich ngapxpadipyich ma nmigügtijcich. N'ihuipyich iy miid miich ycixpi ma je jây ajcxy ti nayyöymújcigixy.

¹³ Nañ jadu'n Cristo ymina'ñ ma yjaybetyity:

Nmijpidägiyich Dios.

E jadüg'oc yminaanip:

Cha iich, miid je ung anäg ajcxy tiibi Dios xymöyich.

¹⁴ Ma jây ajcxy ytügquëx'ajtcixy, tügpí yxiixy, tügpí nî'py je' ajcxy. Nañ jadu'n Jesús ymiid je' anajty yxiixy nî'py jadu'n nej jây ajcxy ymiidity jigix jēbi y'ögy, e jadu'n je' yajhuindigoydähuipy je huidibi anajty jamic'ajtmiid co jây yaj'ögiyb, je' je' je mujcu'. ¹⁵ E jadu'n je Cristo yajnihuädzictuty tüg'óciy pinjaty anajty cojuyiy codoogiy y'ijtp ma je mujcu', miid co tzigiiygixy yi y'o'cin. ¹⁶ Janch co Jesús ymiin ya naaxhuiñ, ca' nminaanim co pubeda'ñ je ángeles ajcxy, je' janchtiy ypubedamyb Abraham y'ap y'oc. ¹⁷ E miid jada ycixpi, Jesucristo jadu'n anajty miidity ninicx etz yjugy'ajtin

tú'ciy miid je jugytijc ymígügtijc ninícx etz jugy'ajtin, jigix jēbi yí' naydügpajc codināy naaxhuiñjāy ajcxy ma Dios yhuinduu miid tudāgy'ajt etz pa'ayoohuin. Etz nañ jadu'n jigix jēbi huindzigīy Dios miid yci'm ñinícx miid jāy ajcxy ypocy ycixpi, e jadu'n yajpocyhuaatzāhuip yi mayjāy ajcxy. ¹⁸Com Jesucristo ci'm tzaachypi minajx yajnax, etz nañ jadu'n je mujcu' Jesucristo jot'ijxy huinma'ñ'ijxy, paady ycixp Jesucristo jēbi pubety pinjaty jadu'n tzaachypi minajxp yajnaxp, etz ma yjot'ixyii yhuinma'ñ'ixyii je mujcu'.

Jesús jacnigi mijity yí' ca'ydí Moisés

3 Miid co Jesucristo jadu'n ti tuñ, paady ycixp miich ajcxy migügtijc huidibi cixyot huinijot mijpidacp Jesucristo, je huidibi ajcxy Dios ti xyhuin'ijxcixy co xyje'adāanigixy. Pidaaccix mhuinma'ñ yajxon ma je Cristo Jesús, je huidibi nejhuiyīm co Dios ti quexy ya naaxhuiñ, je huidibi tūgpajc mījtungmiid ma Dios, huidibi tūgpajc xycodinaayīm ma Dios. ²Jesús tudāgy yí' ti y'ity ma Dios yhuinduu, je Dios huidibi ti yajñibigyii je mījtung, tim jadu'n nej Moisés y'ijty tudāgy ma je ytung miid tūg'óciy jāy huidibi anajty ti cōbijccixy Dios ycōtujcin ma Moisés. ³Jesús ymihuaad ñigi huindzigi'ñ etz cōmayin, ca'ydí Moisés. Tim jadu'n nej pin tūg tijcojpi je' je' ijtp cōmay, ca' nmīnaanīm je tijc ijtp cōmay. ⁴Tūg tūg tijc jim je' pin cojp. Per Dios yí' ti yajcojtāy yaj'oyiýdāy tūg'óciy huidibi ji'ajtp. ⁵E jadu'n je Moisés

tudāgy je' ytuuñ miid tūg'óciy jāy huidibi ti paady Dios ycōtujcin ma yí'. Je Moisés je' ytung'ajti yejcy je tiy'ajt huidibi anajty Dios jac'axam yegamyb. ⁶Je Cristo tudāgy ytuñ miid tūg'óciy iich ajt huidibi mijpidacp Dios, tim jadu'n nej tūg jāy y'lung tudāgy ytuñ ma yteedy ytijc yteedy ypidāgy. Jadu'n iich ajt nbaady nej Dios ytijc, e Cristo tudāgy ytuñ miid iich ajt, pen tudāgy nmibijcin Dios y'ayuc, ca' n'ixmajtzim ajt nmibijcin. Pen nmijpidaacim Dios agujc jotcujc ixti mabaad n'o'cim miid je' ycixpi huidibi njijp'ijxim ma Dios.

Dios yjāy ajcxy ypooocxin

⁷Paady ycixp jadu'n yjaybetyiy ma Dios ñecy ma je Espiritu Santo jadu'n yminañ:

Jadachambi pen mīdooyb miich ajcxy nej Dios yminañ,

⁸ca' ajcxy m'ijtcixy jotjuuñ jadu'n nej je' anajty ajcxy jotjuuñ y'ity, je' ajcxy huidibi mibidīgy Dios jecy'ajt (co ajcxy y'ijty jim mījtigīdūum). Je xii je tiempo jecy'ajty co ajcxy jot'ijxy huinma'ñ'ijxy Dios.

⁹Chi Dios yminañ:

Miich ajcxy mmij'ap mmijteedy ajcxy jim mījtigīdūum xyjot'ijx xyhuinma'ñ'y'ijxich ajcxy jecy'ajty. Ca' ajcxy jāymech co ajcxy y'ijxy anajty canaag mijhuinma'ñ huidibi ndumybich anajty miid yí' ajcxy ycixpi huixchiguiipx jimijt.

¹⁰Paady njotma'tyich miid miich ajcxy mmij'ap mmijteedy

jecy'ajty, e nminaañich:
 “Niidigoy tüdigoy ajcxy jabom
 jabom ma yjot yhuinma'ñ. E
 ca' ajcxy nejhuñhuaangixy
 anajty iich nniñ'aa ndü'aa.”

¹¹ Paady yi' ajcxy nmijotma'tyich,
 e janch janch nnimaayich
 ajcxy, e ca' n'iindägyich, co
 ca' ajcxy ytigñhuipy ma iich
 nbocxtac.

¹² Migügtijc, naygüend'ájtigix
 nidüg nidüg co ni tüg miich
 ajcxy mgamiid'adip jibicjot jibic-
 huinma'ñ, e ni mga'ixmájtzcixipy
 Dios juugypi y'ayuc, miid co
 ca' mmibijccixy. ¹³ Hue' janchtiy
 nayjot'amijmóoyigixy miñ xyipy
 jabom jabom nami xii tiempo
 yjacnixñi. Jadu'n miich ajcxy
 mdunipy, ca'ydí ajcxy yi pocytnii
 xyhuin'iingixy, e chi anajty
 mnaybidáacigixy jotjuuñ. ¹⁴ Pen
 nmibijcim nmijpidaacim Cristo
 y'ayuc tiibi nbaatim oga'n'aty, e ca'
 n'ixtigñhua'cim mabaad n'o'cim, chi
 jëbi n'ijtim miid Cristo.

¹⁵ Je' je' je huidibi jaybetyity ma
 Dios y'ayuc:

Cham, pen mmidooyb miich
 ajcxy nej Dios ymina'ñ, ca'
 ajcxy m'ijtcixy jotjuuñ, jadu'n
 nej je' anajty ajcxy huidibi
 Dios mijotma'tp anajty miid
 co ajcxy mibidigy Dios.

¹⁶ ¿Pinjaty ajcxy huidibi jecy'ajty
 midou Dios y'ayuc e mibidigy
 Dios? Nidüg'óciy je' ajcxy huidibi
 tzomb Egipto naaxjot jecy'ajty
 miid Moisés. ¹⁷ ¿Pinjaty je Dios
 ymijotma't jadu'n huixchiguipx
 jimijt? Je huidijaty ajcxy tundigoy
 miid Dios ytiy'ajt, e je' ajcxy cijx
 y'öctaaygixy jim mijtigiduum.

¹⁸ ¿Pinjaty Dios ñimay co ni camina
 ytigñhuipy ma je Dios y'it ylugar ma
 jëbi ypoocxcixy miid yi'? Je' ajcxy
 huidibi ca' ycapxymidoy. ¹⁹ Paady
 nnejhuiyim co janch ca' ajcxy
 jaty nej ytigñyigixyipy ma Dios y'it
 ylugar miid co ajcxy ca' mibijcy
 Dios y'ayuc.

4 Com nmiidni ajt Dios y'ayuc,
 jadu'n nej ti xyaj'ahuaniiyim
 co ndigiiyim ma yi' chinaydac
 yjugy'ajttac, e nboocxim miid yi'.
 Paady ooy tzocy co ndzigiiyim Dios.
 Ca' jecyity co nidüg miich ajcxy ca'
 mdigñhuipy miid co ca' mmibijccixy
 Dios y'ayuc. ² Nañ jadu'n ti iich ajt
 nmidoohuim je Dios y'ayuc oybi,
 tim jadu'n nej yi' ajcxy jecy'ajty ti
 midooy. Per ca' Dios y'ayuc ma ti
 ypubedyi ajcxy co ti jamidoogixy
 je tiy'ajt. Com hue' ajcxy ymidou, e
 ca' ajcxy mijpidacy. ³ Hich ajt com ti
 nmibijcim je Dios y'ayuc oybi, iich
 ajt je' tigñyimip ma je it huidibi
 Dios ti tijy ma jëbi nboocxim miid
 yi'. Com Dios jadu'n yminañ:

Paady yi' ajcxy nmijotma'tyich,
 e nnimäyich ajcxy,
 n'iibaadyich ngapxpaadyich
 n'ayuc, co ni camina xii yi'
 ajcxy ypocxtac capaadiipy ma
 iich.

Tüg'óciy huidibi Dios yajcojy
 yaj'oyiiy, hue' ti yajcojy ti yaj'oyiiy
 jayijpni ca'ni anajty naaxhuñybi
 chondacy. ⁴ Com ma yjaybetyity
 je tiy'ajt jiiby muumity nigapxy je
 mihuixtujcxiibi ma jadu'n yminañ:

Dios ypoocxy je mihuixtujcxiibi
 miid je' ytung ycixpi tiibi
 anajty tuñ.

⁵ E jadüg it yjaybetyity ma Dios
 ñecy ma jadu'n yminañ:

Ca'p yi' ajcxy ytigíyigixipy ma iich nbocxtac.

⁶Hue' janchtiy Dios yjacmiid'ajtyñi it lugar ma ypocxtac ma jēbi pinjaty ytigíhuip. Yi' ajcxy huidibi tzinay jecy'ajty huidibi jayijp midou Dios y'ayuc, ca' je' ajcxy ytigíy ma Dios ypocxtac, miid co ajcxy capxycōmidoodacy Dios. ⁷Paady ycixpi Dios ti pidägy tūg xii tūg tiempo mina jēbi pinjaty tigíhuipy ma yi' ypocxtac. Je' jadachambi xii tiempo Dios ti pidägy. Dios ti xyñimaayim nej David yminañ tzach com jecy, nej miñ jaybety huidibi ti yajnigapxy co jadu'n ymina'ñ:

Jadachambi pen midooyb miich ajcxy nej Dios ymina'ñ, ca' ajcxy mnaybidáacigixy jotjuuñ.

⁸Co Josué je Israel jäy ajcxy camoy je pooxín, ca' Dios canigapxy huingbi xii mina ytigíhua'ñ ajcxy ma Dios ypocxtac. ⁹Paady ycixp, jadu'n yjac-hui'myñi jadüg xii tiempo mina Dios yjäy ytigíhua'ñ ma Dios ypocxtac. ¹⁰Com pinjaty tigíyib ma Dios ypocxtac hue' je' ypocxy miid je' ytung ycixpi tiibi anajty tuñ, tim jadu'n nej Dios ypooxxy je mihuixtucxiibi miid je' ytung ycixpi tiibi anajty tuñ. ¹¹Hue' tzocy co naymic'ijxim nej huaad ndigíyim ma je Dios ypocxtac, ca' yjecyity co nijēity miich ajcxy mbaduunipy nej ajcxy y'idiich huidibi ajcxy ca' mibijcy Dios y'ayuc, e ca' mdigíyigixipy ma Dios ypocxtac.

¹²Com yi' Dios y'ayuc ijtp yi' huinixii huinitio, e ymiid mic'ajt. Nigi yajtigiyñajxtäy

ninícx, jot almi, ca'ydi tūg espada huidibi mejtz'adu'm'amy jijpíp etz yjijpxu'ñity. E Dios y'ayuc nejhuiydaayb nej jäy ajcxy yjot yhuinma'ñ miidity, e tūg'óciy tijaty ajcxy ñijot'ajtcixyp. ¹³Ca' ji ni ti huidibi Dios ti yajcojy nicxy ñayyüchyii ma yi' yhuinduu. Tūg'óciy nej ajt njot nhuinma'ñ nmiidity ñiguëxictähuip yi' ma Dios, je Dios ma iich ajt nguendi ngíyegaanim, yi' ijxtaayb ajt njot nhuinma'ñ.

Jesús yi' je' je' je' mijhuingapxpi ma Dios

¹⁴Jesús, je Dios y'lung, yi' je' tūgpajc jacmijtungmiid huidibi xycodinaayim ma Dios miid ajt nbocy ycixpi. E Jesús ti ytigíy ma Dios yhuinduu, paady ycixp tzoc ijtim tudägy ma ajt nmibijcín.

¹⁵Pues com Jesucristo, je huidibi tūgpajc mijtungmiidip ma Dios, je huidibi xycodinaayim etz xyhuingapxim ma Dios, com Cristo tzaachypi etz ijxta'ni canaagnax ti yajnaxy, tim jadu'n nej iich ajt tzaachypi etz ijxta'ni nyajnajxim, per je' ca' ma ti bocy tuuñ. Paady ycixpi jēbi Cristo ajt xypa'ayoohuim co ajt nyajnajxim tzaachypi etz ijxta'ni. ¹⁶Tzoc agujc jotcujc nmihuingoanim je Dios y'ane'mdac e n'ojadajtim nmibijctzoohuim Dios, jaydēbi co anajty jotmay nmiid'ajtim, chi Dios may'ajt oy'ajt tunipy miid iich ajt ycixpi.

5 Tūg tūg mijtungmiidpi huidibi huingapxp jäy ajcxy ma Dios, hue' je' yajhuin'ijxp ma yēydijctijc, etz yajnigapxpejty, jaydēbi yhuingapx jäy ajcxy ma

Dios etz yajnaxipy Dioscojuyip miid jäy ajcxy ma Dios, etz yegipy huindzigi'n ma Dios miid jäy ajcxy ypocy ycixpi. ²Je mijtungmiidpi jäy ajcxy yajni'bijc huidibi huingapxp jäy ajcxy ma Dios, jäbi yi' ajcxy pa'ayooy huenpinity huidibi pocy ymiid, com nañ jadu'n yi' ajcxy pocy jihuüy. ³E miid yci'mbocy ycixpi copicy yegipy huindzigi'n ma Dios etz miid jacjadyi jäy ajcxy ypocy ycixpi.

⁴Ni pin huaad ci'm ycanaymöyii je jadu'mbi tung co yhuingapxity ma Dios. Dios yhuin'ijxpy pinjaty huingapxp ma yi' miid jäy ajcxy ycixpi, tim jadu'n nej Dios huin'ijxy Aaron jecy'ajty etz yajni'bijcy yi jadu'mbi tung. ⁵Jadu'n yjaty miid je Cristo, ca' ci'm nayni'bijctzoohuüiyi ma yi jadu'mbi tung. Dios yajni'bijci co huingapxp miid jäy ajcxy ycixpi, e ti ymöyii je mij'ajt jadu'n nej anajty ti nimäy:

Miich je' iich n'ung. iich miich mjugy'ajt ti mmöy cham.

⁶Nañ jadu'n ymina'n jadüg'it ma Dios ñecy:

Miich je' mhuingapxyp je jäy ajcxy ma Dios huinixii huinitiempo, tim jadu'n nej Melquisedec ytuuñ.

⁷Co Cristo chinay ya naaxhuiñ, chi ooy mijuydägy minuxctägy Dios, chi ooy mibijctzoy janch mic je Dios huidibi jäbi ycohua'ñyii ma je o'cin. Miid co ooy mibijcy ooy huindzigi'y Dios miid yung naxy yjot yhuinma'n, paady Dios ymidoohui. ⁸Je Cristo oy je' anajty Dios ja'ung'adyii, yjajti nej ycapxymidoohuipy Dios, miid je' ycixpi nej anajty ti y'ayoy ya

naaxhuiñ. ⁹Co Cristo yajca'pxy yi' y'oy'ajtin miid je tzaachypi huidibi yminajxy yajnaxxy, chi ni'ixi' anajty y'ity jäbi cop'adyii alma nidoocin huinixii, jaydäbi tüg'óciy pinjaty capxymidoob Cristo, ypaadip ajcxy y'alma nidoocin. ¹⁰Dios jadu'n yajni'bijcy Jesús co yajnicxp je jac mijpi tung ma yi' co huingapxp jäy ajcxy ma Dios, tim jadu'n nej Melquisedec ytuñ jecy'ajty.

Je ayo'n co njijpyöyduutim yi mibijcin

¹¹Ooy iich miich ajcxy mij nmiidmiydäga'n ma jadayaabi tiy'ajt, per ooy chachchip nimiyaacnity, com ca' miich ajcxy mic'amy mhuinijihuühuipy Dios ytiy'ajt. ¹²Jadu'n nej jada xii tiempo ti yjecni ma miich ajcxy oga'n ti mmibicy. Hue' miich ixypiy ajcxy mniyaj'ixpijcnip Jesucristo ytiy'ajt je tzipjatyti. Per miich ajcxy mdzojcyñi co myajnajtzcaxpihuipy huinjemy je Dios y'ayuc huidibi ca' chipity. Ti miich ajcxy m'ahuimbijttaaygixy ca' mic majaa ma mmibijcin. Hue' jäyi miich ajcxy jadu'n nipaady nej pi'ctijc huidibi leche uucp, e ca' jadu'n paady nej mij'anäctijc huidibi caagy caayb. ¹³Pinjaty yajpatp ma jada ixpijcin huidibi ca' chipity, jadu'n yi' nej ma'xungdijc com ca' jajtciy je ayuc tiy'ajt tiybi. ¹⁴Je' tzipjatpyi tiy'ajt je je' winjihuiygixp, je' huidibi ymibijkin mij may mid'ajtkixpin, jidu'n nej je' huidibi y'aa ytiitz jim ajkixyin je' titzpi jich kaagy je' ykaaygixpy, je' ko yjajtkixpy je' nej winjiwiygixichin je' huidibi oy, etz je' huidibi ka'oyin.

6 Paady tzoc nigi yajyujcpejtim n'ixpijcin ma Dios ytiy'ajt, tzoc ajt yajyeecim nmibijcin, jigix jadu'n nipaadip jadu'n nej jäy tiibi yhuinma'n yca'pxtaayni. Ca' n'agapxiyo'cim canaag'oc jabom jabom je tiy'ajt huidibi ti nbaatim co oga'n nmibijcin Cristo. Ca' janam jatzojc n'ixpijco'cim huidibi oga'n ti n'ixpijcin jadu'n nej co njothuimbijtim nej anajty ndunim jibicpi huidibi xyajnicxim ma yi o'cin, e jadu'n nej nmibijcin Dios oga'n. ²Ca' jadüg'oc n'ixpijco'cim je xpijcin miid je niibeitin ycixpi, etz jadu'n nej yajcinixajy je mibijcpidijc jaydëbi paadip ajcxy je Dios yjihui'n ymic'ajt, etz jadu'n nej yi öcpi ajcxy yjugypigipy co anajty ti öccixy, etz jadu'n nej Dios tzaachytuna'n huinixi pocyjäydijc. ³Chi njac'ixpijcin Dios y'ayuc je tzipjatypi, pen Dios jadu'n tzojcpy.

⁴Com pinjaty ti huinjihuüy Dios y'ayuc ytiy'ajt, e jäygidägy huidibi Dios yejcpy, etz miidity Dios yjihui'n ma y'ay yjot, jadu'n je' nipaady nejjihuüy chinay ma jiin ytiicxin. ⁵Etz ti ajcxy jäygidägy Dios y'ayuc ytiy'ajt, e ti jihuiygixy Dios yjihui'n ymic'ajt huidibi yajtzinaayip ajcxy y'alma ma je xii je tiempo huidibi miimb cidacp. ⁶Yi jadu'mbi jäy, pen tundigooyb ajcxy jadüg'oc miid Dios ytiy'ajt, e ixmach ajcxy nej anajty ti mibijccixy Jesucristo, ca'p jëbi jadüg'oc jothuimbijtcixy ma Dios miid pocy ycixpi e pijtzoogixy pocyhuinmeecxin jadüg'oc. Co ixypy jadu'n ajcxy tuñ, chi huimbizimy nej ajcxy jadüg'oc yajcruudzpejtcixy je

Dios y'ung miid ajcxy ypocy ycixpi, e nixiiccixy yajxiiccixy nej Jesucristo y'o'cy miid ajcxy ypocy ycixpi. ⁷Jadu'n yi' ajcxy nej naax niu'uctich naag'oc naag'oc ytu'y. E pen je naax yejcpy ooy cosecha ma pin ti niipy ti ytuñ, Dios je' anajty yconuucxin ymiid. ⁸Pen actim apy etz actim jibic ujtz ypidzimy ma je naax, ca' je' ti tzoohuity, e Dios je' yajtigoyamb etz nöctähuip ma je mij jiin. (Jada naax jadu'n jada' nipaady jadu'n nej jäy huidibi ti ixmach ymibijcin.)

Yi huidibi nmibijcin yi' xyhuijtz'ijtim tudägy

⁹Migügtijc ajcxy huidibi ooy ndzocyich, oy iich ajcxy jadu'n njamiidmiydägyich miich ajcxy, janch nejhuüybich co ca' ajcxy ti m'ixmach yi mibijcin, etz nejhuüybich co oybi conuucxin mbaadaangixyp ma Dios etz m'alma ajcxy nidzoocin paadaangixy. ¹⁰Com Dios ooy yi' ytudägyity, e ca' yi' jäydigoy huidibi miich ajcxy mdumyb miid yi' ycixpi, jadu'n nej oyjäy'ajtin ti mdungixy miid jacjadyi mibijcpidijc, e chambaad jadu'n mdungixy. ¹¹Hue' iich ajcxy ndzocyich co miich ajcxy nidüg nidüg mnixondaaccix tungix oyjäy'ajtin ixti mabaad m'öccixy, jigix mbaadipy ajcxy tüg'öciy huidibi ajcxy mjijp'ijxyp ma Dios. ¹²Ca' iich ajcxy ndzojccixy co miich ajcxy m'ahuimbidity nuux. Padungix miich ajcxy jadu'n nej ajcxy ytungixy huidibi mibijcp Jesucristo etz huidibi yajtungixp mecxtujcin, jaydëbi mbaatcixy tiibi Dios xyaj'ahuaniygixy.

¹³Co jecy'ajty Dios moy Abraham je' y'ayuc, ci'm je' nġapxpejty y'ayuc, com ca'anajty ji jac mijpi pin nġapxpedipy je' y'ayuc. ¹⁴Chi Dios Abraham nimay: "Janch co iich miich ngonucxip, e nmöhuipy may m'ap'ung m'apmang." ¹⁵E jadu'n Abraham y'ahuijxy miid mecxtujcin, e jadu'n ycġidigiyyi huidibi anajty Dios ti yaj'ahuanġyii. ¹⁶Co ajcxy jġy ycapxcixy co yjanchity, jim je' pin nġapxpejtp je y'ayuc, je pin jacmijp, je' nġapxpejtpy jada ayuc. E co nġapxpety je' y'ayuc, chi je ayuc y'ity, e ca' huaad pinjaty ymina'n co ca' yjanchity. ¹⁷Paady ycixpi Dios nġapxpejty yci'm'ayuc, miid co anajty yajnejhuġhua'n je jġy ajcxy co cuyduna'n y'ayuc tiibi ahuanġy. ¹⁸Ji yajpaady mejtnax Dios y'ayuc huidibi ca' huaad capxtigach, e Dios ca' y'aniidġgy nimina. E co Dios jadu'n tuñ, chi xyajjotcugġiyim mij, iich ajt huidibi n'ixtaayim e ndzojcin yi' ypubejtin. E ti nmijpidaacim yi' y'ayuc jadu'n nej jġjp'ijxim co xymöhuuanim ajt n'alma jugy'ajtin huidibi ca' ycixipy ytigoyipy ni mina. ¹⁹E miid co njġjp'ijxim co Dios xymöhuuanim ajt n'alma jugy'ajtin huidibi ca' ycixipy ytigoyipy, paady ajt n'alma jotcujc ijtım ca' ma tzigġi'n jġhui'n. Jadu'n Dios y'ayuc nipaady miid iich ajt ycixpi nej tġg puxh huidibi je barco huon'ijtp mejyjoty, ca'ydi nej yjaty je barco. Iich ajt njġjp'ijxim co ndigġhuuanim ma Dios y'it tzajpjoty, tim jadu'n nej je judġo sacerdote mġjtungmiidpi ytigġy anajty jecy'ajty ma Dios y'it ma je Dios ytiġc, je it huidibi anajty adiyducyip

miid huit. ²⁰Tigġhuuanim iich ajt ma je Dios y'it tzajpjoty ma Jesús ytigġy miid iich ajt ycixpi, Jesús ti yaj'ahuġch nej jġbi ndigġiyim ma Dios y'it. E jadu'n Jesús naydügpajc huingapxy etz codinġy mayjġy ma Dios yhuinduu huinixii huinġtiempo. Jesús ytung tim jadu'n nipaady nej Melquisedec ytuñ jecy'ajty.

Yi Jesús tim jadu'n ymġjity nej Melquisedec

7 Je Melquisedec hue' je' anajty rey'ajtp ma je cajp huidi yxii Salem, e je' anajty huingapxp ma je mijpi janchypi Dios tzajpjotypi. Co anajty Abraham yhuimbity co anajty oy ti chiptuñ, ma anajty je reyġġc oy ti yajqueec-huġcxtġy ti mimadactġy, chi Melquisedec choon oy jġpcoyöyġy Abraham, e chi ooy Dios mġjuydacı minucxtacy miid Abraham ycixpi. ²Huidibi anajty Abraham ti paady ma anajty oy ti chiptuñ, chi je' piġc-huġcxy majcpıcy, chi pugoon tġg-pıcy mooy je Melquisedec. Melquisedec yxii hue' yhuimbıdzımy "rey tudġgypi". E com co anajty yrey'aty jim Salem, hue' Salem yhuimbıdzımy "jotcujc'ajtin", paady jġbi nmınaanim jadu'n, "je rey huidibi jotcujc'ajtin yejcp". ³Je Melquisedec ca'p anajty yajnejhuġy ytaj yteedy, ni y'ap yteedy. Ni ycaıajnimıyġgy nej ypi'c'ajty etz nej y'ögy. Tim jadu'n je' anajty yajpaady nej je Dios y'ung, tġg huidibi huingapxp jġy ajcxy ma Dios huinixii huinġtiempo.

⁴Occuenditungıxy miich ajcxy nej je Melquisedec anajty ooy ymġjity. Je Abraham, iich ajt nmġj'ap

nmijteedy ci'm mooy Melquisedec je tüg picypi huidibi anajty ti pijci je rey ajcxy ma oy chiptuñ. ⁵Nej Moisés ycötujcin y'ane'my je' anajty ajcxy yhuingapxy ma Dios ytijc je pinjaty Leví y'ung'ajtpy y'anäc'ajtpy, y'ap'ung'ajtpy y'apmang'ajtpy. Je' ajcxy cötujc miid co jäy ajcxy yajcuend'adipy tügpicy je majc-picypi huidibi xii diezmo. Oy je' anajty ajcxy ja'ajugy'adyii ja'amigüg'adyii, com hue' anajty ajcxy Abraham y'ap y'oc nidüg'óciy. ⁶Per Melquisedec oy je' anajty ca' Leví ap'adyii teedy'adyii, yajcujt je Abraham tügpicy je majc-picypi. Je' je' anajty huidibi c'idigiyyi tiibi anajty Dios yaj'ahuaníy. Jadu'n Melquisedec yajpuhuaníy Dios je Abraham. ⁷Ni pin ycamina'nip co ca' yjanchity co je pin conuucxin yejcp, jac mij je', ca'ydi je pin yajconuucxp. ⁸Ya ma iich ajt, pin c'idigiyyip tügpicy je majcpicypi (diezmo), hue' je' ajcxy jäy huidibi öcp. Per jadu'n nej anajty Melquisedec, jadu'n ymina'n ma yjaybetyity co je' yjactzinaayñi. ⁹E jëbi yajmina'n co je Leví etz jadu'nyibaad je y'ap y'oc huidibi ajcxy huingapxp ma Dios, e yajcujtcixy Israel jäy huidibi Dios patip, nañ jadu'n nipaady nej jihuüy ymigüety je' ajcxy je Melquisedec huin'lit co Abraham ymigüejti. ¹⁰Jadu'n nipaady nej jihuüy Abraham ñigix'ajtyñi y'ap'ajtin yteedy'ajtin Leví etz jacjadyii je huidibi anajty ajcxy ca'ni ypi'c'atyñi yma'xung'atyñi co oy Melquisedec yjijpcobadiyyi.

¹¹Je Israel cajp yajc'idigiyyi je' je Dios y'ane'min ycötujcin je Levita

ajcxy huidibi anajty huingapxp je mayjäy ma Dios, je' je' anajty ajcxy Aarón y'ap y'oc. Chi jada' co jada ajcxy janch ca'ocyaj'ahuimbijttäy tudägy pinjaty anajty je Dios ycötujcin payöyb, ca'p tim je' anajty ycopicyity co ycajacquëxigy jadüg huidibi codinähuip je mayjäy ma Dios, ca' y'ocje'jiñ ma ymiñ Aarón y'ap y'oc. Je jadügpi huidibi codinähuamyb je mayjäy ma Dios, hue' copicy co tú'ciy naybadiiyb miid Melquisedec. ¹²Co ytigadzipy pinjaty huingapxp ma Dios, nañ jadu'n ytigadzip je tiy'ajt je cötujcin. ¹³Iich ajt nHuindzin Jesucristo, je huidibi ñimiydacpy ma Dios ñecy co huingapxa'n je mayjäy ma Dios, huingbi ap huingbi Teedy je' anajty, ca' y'ocLev'jin. E ni tüg yi' y'amigüg ca' yhuingapxy ma Dios. ¹⁴Huädz yajnejhuüy co iich ajt je nHuindzin Jesús hue' je' anajty ymij'ap'ajty ymijteedy'ajty je Judá. Moisés ca' yi' capxpaty Judá y'ap y'oc co nimiydacy pinjaty anajty huingapxp je mayjäy ma Dios ytijc.

¹⁵Jacniguëxip jada ooy co jadüg ytigiyy huidibi tumb ma Dios, huidibi tú'ciy naybaatip miid Melquisedec. ¹⁶Ca'p Jesucristo yajtungbijci co huingapxp je mayjäy ma Dios miid je cötujcin huidibi minaamb co yi' y'amigügtijc pátip yi jadu'mbi tung, je huidibi ajcxy yjugy'ajtin cixip tigoyip. Hue' je Jesucristo chinaayin yjugy'ajtin ca' ycixipy ytigoyipy ni mina, paady ycixp Jesucristo yajtungbijci huingapxp je mayjäy ma Dios. ¹⁷Com miid je' ycixpi jadu'n Dios tiy'ajt yejcy co jadu'n ymina'n:

Miich je' cham mhuingapxyp
je mayjäy ma iich. Tüg
nax miich mhuingapxin
nej Melquisedec anajty
yhuingapxy.

¹⁸E jadu'n je oga'nbi je ane'min
cötujcin huidibi Moisés yejc,
ca' y'octuni cham, ca' jac ti
mic'ajt miidity co jaydëbi
yajtzögipy jäy ajcxy y'alma. ¹⁹Je
Dios ycötujcin huidibi Moisés
jayhui'm jecy'ajty, ca'p je' ni ti
yaj'oybidzimy yajhuätzpidzimy.
Miid je huingapxpi ycixpi huidibi
nmiid'ajtim cham jac'oy yi' huidibi
njijp'ijxim ma Dios.

²⁰Co Dios Jesucristo yajtungbicy,
chi nïgapxpejty yci'm ayuc co
yjanchity. ²¹Jacjadyii ajcxy huidibi
anajty tungixp ma Dios ytijc, hue'
je' ajcxy tungmooyi, e ca' Dios
nïgapxpejty yi' ajcxy y'ayuc. Per
co Jesucristo ytungbijcy, chi Dios
nïgapxpejty yci'm'ayuc. Com
jaybety jadu'n ma Dios ñecy ma
jadu'n ymina'ñ:

Je Huindzin Dios ti nïgapxpety
yci'm'ayuc, e ni mina
ycajotmetzcïhuipy.

Jadu'n Dios nimay y'ung:

Miich mhuingapxamyb etz
mgodinähuaryb je mayjäy
ma iich huinixii huinitiempo.
Jadu'n miich mdunipy nej
Melquisedec ytuuñ.

²²Com Dios nïgapxpejty yci'm'ayuc
co yjanchity co Jesucristo
ytungbijcy, paady yi Jesús
yi' je' majamoy mic'ajtmoy je
jemybi ayuc huidibi yajhui'm
miid jäy ajcxy ycixpi, je jac'oybi
cötujcin. ²³Jacjadyii huidibi
anajty yhuingapxcixy ma Dios

ytijc, nimay anajty ajcxy ooy. Com
co tüg y'o'cy, chi huingbi ytigy
ma je' ytung. ²⁴Jesús com ca' yi'
yjugy'ajtin ycixipy ytigoyipy ni
mina, paady ca' ytung ixmach, etz
ca' yi'ytungmöy ni pin. ²⁵Miid je'
ycixpi Jesucristo mic'ajt miidity
jaydëbi yajnïdzoocipy jäy ajcxy
y'alma huinixii huinitiempo, pinjaty
mibijctzooyb Dios ma Jesucristo
yxii. Jesucristo jëbi tunipy jadu'n,
com yi' yjugy'ajtin ca' ycixipy
ytigoyipy ni mina. E yi' Dios
mibijctzodiib miid jäy ajcxy ycixpi
jabom jabom huinixii huinitiempo.

²⁶Je Jesús je' je' tügpajc je
mijtungmiidpi ma Dios, huidibi
iich ajt nyajmayajtim, je huidibi
miid huädz yjot huädz yhuinma'ñ,
e ca' je' miidity ni ti jibicpi ni ti
pocy. Je' ca' tügnax y'ity miid
pocytumbidijc. Nigi je' ymijity
ycixity, ca'ydi jac ti huidibi yajpat
tzajpjoty. ²⁷Ca' Jesús yjadu'nity
nej ajcxy jacjadyii huidibi tuun ma
Dios ytijc jecy'ajty, co yaj'öccixy
iyujc, e je' ajcxy yejcpy huindzigi'ñ
jabom jabom, midüg co je' ajcxy
ñayyajpocyñihuächyii, e chi jada'
miid jäy ajcxy ypocy ycixpi. Jesús
tügtecypajc je' yejc huindzigi'ñ
miid mayjäy ycixpi, co je' ci'm
ñayyejci ma yi o'cin jadu'n nej tüg
huindzigi'ñ. ²⁸Je Dios ycötujcin
huidibi Moisés yjayhui'm jecy'ajty,
hue' y'ane'my co huen tungmöy
jäy ajcxy huidibi pocy miid, co
mijtungmoy ma Dios ytijc. Chi
jac'axam Dios yajhui'my jemybi
ayuc jemybi cötujcin, e nïgapxpejty
yci'm'ayuc co yjanchity. E miid
je jemybi ayuc Dios tungmoy
yci'm'ung, huen yajnicxip je mijpi

tung ma yi' y'it, je Dios y'ung
huidibi ijtp huinixii ca' ti bocy
miidity.

**Jesús yi' je' je mihuingapxpi
ma yi Dios y'ayuc jemybi**

8 Huidibi ooy nīgi ycopyity, huidibi yajnimydaacp, co iich ajt nmiid'ajtm pin xycodinaayim ma Dios, je' je' je Cristo, je huidibi jiiby ijtp mij'ane'mbi tzajpjoty, jadu'n nipaady nej jihuüy yi' y'iñäy a'oy'amy ma Dios ymijc. ²Jiiby je' ytuñ ma je janchypi Dios y'it ylugar, je amaaybi, huidibi oyhuindzigy ijtp. Je it huidibi Dios yajcoj, e ca' nminaanim jäy ajcxy yajcoj. ³Tüg'óciy pinjaty huingapxp ma Dios, yajnibicy je' paady, e copyity co cäyegipy ofrenda etz tijaty huindzigi'n ma Dios miid jäy ajcxy ypocy ycixpi. Paady ooy ycopyity nañ jadu'n co Jesucristo yegipy ofrenda etz huindzigi'n ma Dios miid jäy ajcxy ypocy ycixpi. ⁴Co Jesucristo ixypy ya y'ocyajpaady naaxhuiñ, ni ycahuingapxy ixypy mayjäy ma Dios. Com jiini ya yajpaady pin huingapxip ma Dios ytiyc, pin yejcp ofrenda etz huindzigi'n jadu'n nej Moisés ycötujcin y'ane'my. ⁵Jadayaabi huingapxpi ajcxy ytungixy ma Dios ytiyc ya naaxhuiñ. Je' je' tüg iixpejt nej Dios y'it jiiby tzajpjoty, jadu'n yi' nipaady nej tüg anecpi huidibi tzomyb jiiby tzajpjoty. Co Moisés jecy'ajty Dios ytiyc je' coji miid huit, chi Dios ñimaayi: “Cuenditun yajxon co anajty mgojy je tije tügenax jadu'n nej je iixpejt huidibi nyaj'ijx jim copcxy.” ⁶Per je migtung huidibi

Jesús ytumyb ma Dios miid jäy ajcxy ycixpi, jac'oydung yi' ca'ydi je tung huidibi je jäy ajcxy ytumyb huidibi migtung miid ma Dios ytiyc ya naaxhuiñ. Com jemybi etz jac'oy etz jacmic'ajt miid je cötujcin huidibi Dios ymoy Jesús, ca'ydi je cötujcin huidibi Dios ymoy Moisés jecy'ajt. Com hue' je' jac'oy alma nüdzoocin Dios yaj'ahuaniiy jäy ajcxy ma je jemybi cötujcin.

⁷Co je jayijp'atypi cötujcin huidibi Moisés ymooyi cayaj'oyidaayi jäy ajcxy ypocy miid Dios, ca' yi' ixypy ycopyity je mimetzpi cötujcin huidibi Dios ymoy jäy huinjemy.

⁸Per Dios y'ijx co je jäy ajcxy ca' yajxon cuydungixy je cötujcin huidibi Moisés ymoy, jadu'n nej ymina'n ma yjaybetyity ma Dios ñecy miid je' ajcxy ycixpi, ma jadu'n ymina'n:

Jadu'n je Huindzin Dios ymina'n: “Mimb xii tiempo ma huingbi cötujcin nmöhuibich yi Israel jäy etz Judá jäy ajcxy.

⁹Ca' y'ocjadu'niñ nej iich ngötujcin huidibi nmooyich je' ajcxy y'ap yteedy jecy'ajty, je huin'it tiempo taabi nyajtzoönich ajcxy jim Egipto naaxjot. Ca'p je' ajcxy cuyduñ je cötujcin huidibi ajcxy nmooyich, e paady ca' nduüñich cuendi yi' ajcxy.” Jadu'n ymina'n je Huindzin Dios.

¹⁰Jadu'n je Huindzin Dios ymina'n: Je cötujcin huidibi nyegaamybich ma Israel jäy ajcxy co anajty yijadu'mbi xii tiempo ti ñaxy, jadu'n je'.

Nbidägibich ngötujcin ma yì' ajcxy yhuinma'ñ, e jadu'n nipaady nej jihuüy ti njayich n'ayuc ma ajcxy y'ay yjot. E iich yì' ajcxy xyDios'adiib, e yì' ajcxy njäy'adiiybich.

¹¹ Tüg'óciy ajcxy nejhuühuipy pin iich. Ni pin ji cayaj'ixpigipy pin je' je Huindzin Dios, ni pin, ni ymigüg, ni ymijiin ymidijc, ni pi'ctijc ni mij'anäctijc. Com nidüg'óciy ajcxy nejhuühuipy pin iich; ypi'city ymutzity, ymijjáyity, etz ymij'anäcity.

¹² E iich yì' ajcxy nmeecxip yjibicjäy'ajtin, ni camina ngajac'ajihuühuüybich ajcxy ypocy. Jadu'n Dios ymina'ñ.

¹³ Co Dios je' ycötujcin jemybi nimidyägy, je' je' co yaj'amijiiyñi je jayijp'atpyi cötujcin. Je huidibi amijiiyñi ca' je' y'octuunip, tzojc yì' yaj'ijxtigoyaani.

Je Dios ytijc huidi ya naaxhuiñ etz Dios y'it huidi tzajpjoty

9 Je Dios ycötujcin jayijp'atpyi ymiid je' anajty ñidiy'ajt nej huaad ytuñ ma Dios ytijc ya naaxhuiñ, ma jäy ajcxy huindzigihuipy Dios. ²Je Dios ytijc jadu'n je' ycojity. Je jayijpi cuarto hue' anajty xiijity Lugar Santo, jiiby anajty y'ity je candelero etz je mesa ma tzajcaagy y'ity ma Dios yhuinduu. ³Jiixci'py'amy ma je mimetzpi huit y'agiyducyity jiiby jadüg'it huidibi xiijip Lugar Santísimo (ma Dios ni'ixcidägy je jäy). ⁴Jiiby anajty tüg mij mesa ac tim ori je' anajty ma ajcxy ypoomjojcixy, e ma je' jim

anajty y'ity tüg cajoon ac ori je' anajty yñinícx huidityi. Jiiby cajoonjoty anajty y'ity tüg tu'tz ac ori huidibi anajty miid je jicxy ijxpejt huidibi Dios Israel jäy ajcxy ymooy jecy'ajty. Etz jiiby anajty Aarón ytajc huidibi huijp huam. Etz jiiby anajty je tzaa y'ity ma je' anajty yciyxjayity Dios y'ane'min.

⁵Ma je cajoonnícx jim anajty je querubines ñgojtüdyity huidibi Dios y'oy'ajtin miid. Je querubines anajty codinaayb Dios, e je' anajty ajcxy yajnídigooyb miid yqueec je cajonnícx ma ajcxy je huindzigi'ñ ñi'py ypidacy miid jäy ajcxy ypocy ycixpi. Ca' huaad yjacyajnimidyacy mijcajee jadachambi tijaty huidibi anajty yajpatp jiiby ma Dios ytijc.

⁶Jabom jabom co anajty jadu'n y'ijttäy ni'ixi', chi je huingapxpi ytigiiygixy ma Dios ytijc ma je jayijpi cuarto, je Lugar Santo, tuñ ajcxy huindzigi'ñ etz cuydungixy yì' ajcxy ytiy'ajt miid Dios ycixpi.

⁷Jimijt jimijt ma je mimetzpi cuarto huidibi je huit adiydujcp, jiiby ytigiy tügtecypajc je huingapxpi huidibi jacmijtungmiid ma Dios ytijc. E co jiiby ytigiy, chi midigiy huaj ñi'py, huidibi miid huindzigi'ñ Dios miid yci'mbocy ycixpi etz miid tüg'óciy jäy ajcxy ypocy ycixpi etz miid ajcxy ypocy ycixpi co ca' nejhuüygixy co ytundigooygixy. ⁸Miid jada ycixpi je Espíritu Santo xyajnejhuüyim co je tungmiidpi huidibi huingapxi je mayjäy ma Dios, ma ajcxy jacyajtungixy anajty je jayijp cuarto ma Dios ytijc, chi ca'ni je' anajty y'ahuächñi nej jëbi pinjaty ytigiy ma je it lugar Santísimo ma Dios

yhuinduu. ⁹ Je Dios ytijc huidibi ijtp anajty ya naaxhuiñ ca' je' yjējity je janchypi. Hue' je' anajty ijxpejt'ajtp huidi Dios y'it'ajtpy tzajpjoty. Jiiby je tungmiidpi huindzigiy Dios miid ofrendas etz miid huindzigiñ. Per jada huindzigiñ ca' yajtigoy je pocytuni ma je jāy ajcxy yjot yhuinmañ. ¹⁰ Je judíoJay ytiy'ajtp huidibi tuun ma Dios ytijc jecy'ajty, hue' je' ñigapxy caayin uucin, etz jadu'n nej ajcxy ñayyajpocyñi huáatzigixy miid nii etz canaag costumbre huidibi ajcxy cuydumy. Jadu'n ajcxy ytuñ ixti cooni Dios yajtigajztay tūg'óciy yi' ycōtujcin.

¹¹ Per ti y'oy ya naaxhuiñ je Cristo, e yi' je' cham ijtp jacmijtungmiidpi ma Dios, yi' ti mimiñ jemybi cōtujcin jac'oybi. E yi' je' codinaayb je mayjāy ma Dios y'it tzajpjoty, je it jac'oybi jacmijpi, jacca'pxypí, ca' nminaanim jāy ti cojy, e ca' yaajity naaxhuiñ. ¹² Cristo ti ytigiy ma je Dios y'it, je lugar Santísimo. Ca' ti ytigiy miid co jiiby yajquēxigañ pi'cchivo ñi'py o toro ñi'py, hue' yci'mni'py jiiby yejcpy ma Dios. Jadu'n ti ytigiy tūgtecy tigiy huinixii huinítiempo, etz xyyajnidzoocim ajt n'alma huinixii. ¹³ Ooy yjanchity co yi toro ñi'py etz je chivo ñi'py etz yi cuyjam co ajcxy nõccixy huaj niix ma je Dios ojadajttac, co ajcxy je pocyjāy yajni'huāxcixy je ni'py etz yajnixidujtcixy je cuyjam ymiid mic'ajtp co yajpocyhuáatzigixy ñin'icx, per jotjoty ca' yajhuāch. ¹⁴ (Je huingapxpi huidibi tumb ma Dios ytijc ya naaxhuiñ ca' ymadāgy co jāy yajpocyhuādzipy miid toro

ñi'py), Jesucristo ñigi ti ymadāgy yajpocyhuāch jāy ajcxy miid yci'mni'py. Com Jesucristo ymiid je Dios yjihuiñ ymic'ajtp huidibi ca' ycixipy ytigoyipy ni mina, chi ñaygyejci ci'm ma Dios miid Dios yjihuiñ ymic'ajtp, jadu'n nej tūg huindzigiñ huātzpi, com ca' ni ma ni ti tundigoy. E miid yci'mni'py Jesucristo xyajhuaatzim je jibicpi ma ajt njot nhuinmañ, ca'ydí ndunim huidibi Dios ca' jāygidāgy, e jadu'n ajt huaad ndunim ma je Dios juugypi ytung.

¹⁵ Paady yi Jesucristo yi' je' huingapx'ajtp ma Dios miid iich ajt ycixpi miid je jemybi ycōtujcin huidibi Dios yajhui'm. Yi Jesucristo co y'o'cy, yi' ajt je' nbocy xymeeccim tiibi ndundigooyim ma je jayijp'atyp cōtujcin huidibi Moisés jayhui'm. E jigix pinjaty Dios ti yhuin'ixyii, jēbi ajcxy ycōdigiyii je tzinaydac ma jēbi n'ijtim huinixii. Je tzinaydac huidibi Dios ti xy'ahuaniiyim. ¹⁶ Co tūg jāy jijp'ixy y'o'cin, e yajcojy tūg testamento, ooy ycopicyity co yajnejhuihuipy pen janch je' ti y'ōgy je pin yajcoj je tiy'ajtp jigix je' ytigihuipy tumbi je tiy'ajtp. ¹⁷ Co tūg jāy jijp'ixy y'o'cin e yajcojy tūg testamento, ca' je' ti mic'ajtp miidity je testamento pen jugy'ajtpni pin je' anajty ti yajcojy. Huin'itni janchtiy co anajty ti y'ōgy, huin'it je testamento mic'ajtp miidity. Je jemybi tiy'ajtp huidibi Dios xyajhui'my jadu'n yi' nipaady nej jāy testamento yajcojy co anajty jijp'ixy je y'o'cin, e co Jesús y'o'cy, huin'it mic'ajtp moy je Dios ytiy'ajtp je jemybi. ¹⁸ Paady ycixpi jecy'ajty

co Dios Moisés moy cõtujcin, yajtzoobaat je' miid iyujc ñi'py. ¹⁹Moisés je' capxhuäcx je Dios ytiy'ajt ma tüg'óciy mayjäy. Chi jada' huijtzigy tüg lana tzaptzpi miid tüg quipy aacx huidibi ooy oy yxuugy. Je' yajxooc ma huaj mang ñi'py etz chivo ñi'py teemhuidity miid ñi, chi Moisés yajni'huich je libro miid je ñi'py, je libro huidibi anajty ti capxy etz nañ jadu'n jäy ajcxy yajni'huich je ñi'py. ²⁰Co Moisés jadu'n ytuuñ, chi yminañ: "Jada je' je ñi'py huidibi yajtzoobatp je ane'min je tiy'ajt huidibi Dios ti yecy ma miich ajcxy." ²¹Moisés nañ jadu'n ñi'pyñi'huich je cochac tijc ma anajty yDios ojadajtcixy, e tüg'óciy tumbejt huidijaty jiiby tumb. ²²Dios ycõtujcin, je jecyip, yminañ co tüg'óciy huidijaty yajtungixyp co Dios ojadajtcixy, copicy yajhuädzipty miid ñi'py. E pen ca' ajcxy teemy yocy ñi'py, Dios ca' huinmecxa'n yi' ajcxy ypocy.

Co Cristo y'o'cy miid ajt nbocy ycixpi, yi' yajni'cxy ajt nbocy

²³Ooy jada anajty ycopicyity iyujc ñi'py huindzigiñ, jigix yhuädzip huidijaty tumb ma Dios ytiyc ya naaxhuiñ, je huidibi ijxpejt'ajtp anajty nej Dios y'it jiiby tzajpjoty. Per je Dios y'it huidibi jiiby tzajpjoty chojcpy jac'oybi huindzigiñ ca'ydi huidi ya naaxhuiñ. ²⁴Com Cristo ca' je' ytiyiy ma Dios ytiyc huidibi jäy ajcxy ti cojy. Je tijc huidibi jäy ajcxy ti cojy, je' je' ñigojtuutin je it lugar janch janchypi huidi jiiby tzajpjoty. Cristo tigiyy ma je Dios y'it ylugar jiiby tzajpjoty, ma

je' cham xycodinaayim ma Dios yhuinduu. ²⁵Je judío mĩjtungmiidpi huidibi huingapxp ma Dios ytiyc, huinjimĩjtity ytiyiy ma je Dios ytiyc co yecy ñi'py huidibi ca' ci'mni'py'adyii. Cristo ca' y' ñay'ahuanĩyii y'ögipy canaag'oc, jeyi tũgtecypajc ytiyiy ma Dios y'it miid yci'mni'py. ²⁶Co ixipy ca' yjadu'nity, canaag'oc Cristo ixipy patni chaachy'öcin maabi naaxhuiñybi chondagy. Per jadachambi ma xii tiempo ycixaani ytiyoyaañi, Cristo tũgtecypajc ñayguëxici ya naaxhuiñ, jigix codinãhuipy tũg'óciy jäy ma Dios miid ajcxy ypocy ycixpi. Jadu'n Cristo tuuñ jigix yajtigoyipy pocytunii. ²⁷Dios ane'min pidac ya naaxhuiñ co nidũg nidũg jäy paadip yi o'cin tũgtecypajc. E Dios ti pidagy je xii je tiempo mina tiydunañ nidũg nidũg jäy miid ypocy ycixpi. ²⁸Je Cristo jotucj tũgtecypajc nayyejci ma je o'cin co yajpocyñihuaatztäy je mayjäy. Chi jada' ñayguëxigañyii je mimejtz'ocpi ya naaxhuiñ, e ca' nminaanim co yajpocyñihuaatzaanip jadũg'oc je mayjäy, hue' je' nihua'namyb ycohua'namyb tũg'óciy pinjaty jãjp'ixip cixyot huinjot co je' miinañ miid yi' ajcxy ycixpi.

10 Je Dios ycõtujcin huidibi Moisés jayhui'my jecy'ajty, hue' je' anajty ñidiy'ajt je oybi huidibi miinamb. Ca'p je' anajty yjējity je oybi. Paady je cõtujcin huidibi Moisés yjayhui'm ca' je' jēbi huädz yaj'ahuimbity pinjaty pocy ytumb, pinjaty mijhuäcp anajty ma Dios miid je iyujc

huidibi ajcxy Dios yajhuindzigiib, huidibi ytun'ahuimbijtcixyp jímíjt jímíjt. ²Co ixipy je cõtujcín y'ocmadägy huidibi Moisés yjayhui'm yaj'ahuimbity ixipy huädz ajcxy je pocy ytumbi, ca' ixipy je jadu'mbi huindzigi'n y'ocyajtuuni jímíjt jímíjt. Com pin je jadu'mbi huindzigi'n yejcp, co ixipy je' ypocy yajnicxtäy, ca'p je' ma ñayjihuihuiyb ti bocy miidity jadüg'oc. ³Co jadu'n yaj'öccixy je iyujc miid ypocy ycixpi, je' je' je tiy'ajt co ajihuiygóotigixy ypocy jímíjt jímíjt. ⁴Com yi huaj mang ñi'py etz yi chivo ñi'py ca' mic'ajt miidity co pocyyajnicxtähuipy nimina.

⁵Paady co Cristo ymiiñ ya naaxhuiñ, chi nímay je Dios:

Ca' miich ni ti huindzigi'n mdzojcní ma ymiiñ iyujc'ögy, ti miich xyñi'ixi'yich tüg ninícx.

⁶Ca' m'ocjäygidaacni huindzigi'n iyujc huidibi yajno'cp. Ca' miich m'ocjäygidaacni co jäy xyajhuindzigi'y iyujc miid ypocy ycixpi.

⁷Chi nmína'ních: “Dios, cha nmiiñích jigix miich mdzojcní yajcuydunipy, jadu'n nej yjaybetyity ma miich mnecy miid iich ycixpi.”

⁸Tim jayijp, Cristo ymina'n co Dios ca' octzojcní, ni cajäygidägy je iyujc ögy huidibi yajhuindzigi'yip, ni je huidibi yajno'cp, jigix je pocyñicxtähuipy, oy yi' yjajëjity huidibi ñigapxy yajtunipy ma je Dios ycõtujcín huidibi Moisés yjayhui'm. ⁹Chi jada' jadüg'it yjaybetyity co Cristo jadu'n

ymina'n: “Cha iich nmiiñ, jigix miich mdzojcní yajcuydunipy, miich huidibi Dios'ajtp.” Hue' minaaním, yajtigoy je cõtujcín huididi ane'mb co jäy ajcxy huindzigi'y iyujc miid ypocy ycixpi, etz mic'ajt mo' je jemybi cõtujcín huidibi Jesucristo xymooyim.

¹⁰Dios jadu'n ti xyajhuaatzim ajt nbocy, com Jesucristo ti tuuni Dios chojcní co ci'm ñinícx tügtecpajc yejcy ma yi o'cín miid tüg'óciy jäy ypocy ycixpi.

¹¹Tüg'óciy judío sacerdote huidibi tungmiid ma Dios ytíjc jabom jabom jadu'n tun'ahuimbijtcixy tügpi huindzigi'n, huidibi ni camina yajnicxtaayi jäy ajcxy ypocy. ¹²Yi Jesucristo tügtecpajc yi' yejcy ñinícx ma yi o'cín huinixii huinitiempo, chi jada' y'ixtacy a'oy'amy ma Dios ymíjc ma ane'mdäy tüg'óciy. ¹³Jiiby tzajpjoty Jesucristo cham y'ahuixy, ixti cooni Dios yi' ymidzip mimadactaayip, e jadu'n ajcxy nipaadipy nej jihuiy Jesucristo ytecpocxpejt. ¹⁴Miid tügpajc je huindzigi'n huidibi Jesucristo yejc, tudägy yaj'ahuimbijttäy huinixii huinitiempo pinjaty ti ypocyhuäch. ¹⁵Yi Espíritu Santo nidiy'ajtp ma iich ajt jadu'n nej Cristo ti tuñ. Com jaybety miiñ ma Dios ñecy ma Dios jadu'n ymina'n:

¹⁶Je huin'it xii je huin'it tiempo nyajmihui'maamybich je Israel jäy jemybi ayuc jemybi tiy'ajt. Nbidägibich ngõtujcín ma ajcxy yjot, e njayamybich ngõtujcín ma ajcxy yhuinma'n.

¹⁷Chi jac'axam Dios ymina'n:

Ni camina njäy medzaanich
ajcxy ypocy, etz jadu'n nej
ajcxy ytundigooy.

¹⁸Co je pocy ti yajhuinmecxtäy,
ca'p ycopycxy yjacyajtunipy tijaty
huindzigi'n miid pocyhuinmeecxin
ycixpi.

Chojcxy nmihuingoonim yi Dios

¹⁹Paady miich ajcxy migügtijc,
jëbi iich ajt ndigiiyim agujc
jotcujc ma Dios yajpaady miid co
Jesucristo ti temy ti yocy ñi'py miid
iich ajt nbocy ycixpi. ²⁰Cristo ti
yaj'ahuäch je ñi'aa je tü'aa miid
iich ajt ycixpi miid yci'm ninëcx,
je ñi'aa tü'aa jemybi oybi huidibi
tigiiyb ma Dios y'it. E je' yñinëcx
jadu'n nipaady nej je huit huidibi
anajty adujc je Lugar Santísimo
ma Dios ytijc ya naaxhuiñ, je huit
huidibi ciichhuäch co Cristo y'o'cy.

²¹Jesucristo yi' je' je mijtungmiidpi
huidibi xycodinaayim ma Dios
ytijc jiiby tzajpjoty. ²²Paady ycixpi
jëbi nmihuingoonim Dios miid
oyjot oyhuinma'n, etz miid je
mibijcin janchypi. Cristo ajt ti
xyajhuaatzim njot nhuinma'n co
ñi'py temy yojcy miid ajt nbocy
ycixpi jigix ca'ydi nayjihuiyim
pocymiid, jadu'n nej jihuüy ti
ndziihuim miid huädz ñi. ²³Tzoc
tudägy n'ijtim ma nmibijcin, ca'
nyajtigajtzim nmibijcin, com Dios
cuydunipy yi' tiibi xyaj'ahuaniiyim.

²⁴Tzoc nhuinma'ñypidaacim co
njot'amijmooyim ajt nmigügtijc,
jaydëbi naychojcin nayjihuiyim
miñ xyipy, e nduunim oyjäy'ajtin.
²⁵Ca' n'ixmajtzim je nanyöymugii,
jadu'n nej ajcxy nijëjity
costumbre miidity co ca' ajcxy

yöy ma naymujctac. Nigi tzoc
nayjot'amijmooyim, e jadu'n nej
cham yaj'ijxni co yhuingooni ma
je Huindzin Jesucristo ymiinaani
jadüg'oc ya naaxhuiñ, chona'n
tzajpjoty.

²⁶Pen iich ajt jaccocyunim
tzojcingíxy ma anajty ti
nejhuiyim Dios ytiy'ajt, ca'p
ji huingbi huindzigi'n huidibi
xyajpocyhuaatzim. ²⁷Je'
janchtiy njacjijp'ijxim miid
tzigi'n jihui'n je tzaachypi co
anajty Dios xytiydunim, e
xypidaacim mijjiinjoty huidibi
yajhuindigoydähuamb Dios ymidzip.

²⁸Co pin cacuyduun Dios ycötujcin
huidibi Moisés yjayhui'm, e jim
metz o tugiig testigo co yjadu'nity,
yajmoy je' y'o'cin ca' miid'ajty ti
pa'ayoohuin. ²⁹¿Nej miich ajcxy
minaangixy? ¿Nej cay jac'öctiy
je tzaachypi mihuaad'ajtcixy? Je
pinjaty ca' ixa'n Dios y'ung etz
nixiici yajxiici Cristo ñi'py huidibi
yajpocyñihuaatzp, jadu'n nej je
jemybi ayuc ymina'n huidibi
Dios yajhui'm. Etz nañ jadu'n
ajcxy ni'o'jiygixy Dios yEspíritu
huidibi may'ajt oy'ajt tumb
miid je' ajcxy. ³⁰Nejhuiyim co
je Huindzin Dios ymina'n: "ñich
xypatp ndzaachytunipyich jäy
ajcxy miid ypocy ycixpi. ñich yi'
nyajcomidohuipy ajcxy ypocy."
Etz nañ jadu'n yjaybetyity ma
Dios ñecy: "Yi Huindzin Dios
yi' yjäy tiydunipy." ³¹¡Ooy chach
mij y'ayo'nity pen je Dios juugypí
xychaachytunim miid ajt nbocy
ycixpi!

³²Per ajihuüiyigixy miich ajcxy je
xii je tiempo tiibi ñaxy, je taabi miich

anajty ajcxy ti xycidigfiygixy je tiy'ajt janchypi, ñipaty je' anajty nej tüg tiicxin jain ajcxy miidity. Ti ooy mhuindinaaygixy mijiptinaaygixy tzaachypi ayo'n miid yi mmibijcin ycixpi. ³³Nijëjity miich ajcxy ti myajhuingapxnajxcixy, e ti myaj'ojcixy mayjäyduum. Nañ jadu'n jacjadyi ti abaatcixy tzaachypi jadu'n nej je tiibi ajcxy ooy yajtzaachtungixy. ³⁴Ti miich ajcxy myajtungixy pa'ayo'n ma pinjaty anajty pujxtigotyip, e janch agujc jotcujc ajcxy ti myajtungixy mecxtujcin co ajcxy xypijci tijaty anajty ajcxy miid. Nejhuüyim co jiiby tzajpjoty miich ajcxy miidity ti jaty jac'oybi huidibi huinixi huinitiempo ijtp. ³⁵Jacmijpidaaccixy Dios, ca' mjetmetzciygixy. Co mmijpidáaccixipy Dios, huin'it ajcxy mbaadipy oybi may'amy ma Dios. ³⁶Chojcxy co miich ajcxy myajtúngixipy mecxtujcin co mguydunaangixy nej Dios tzocy, e Dios xyajcidigfiygixip huidibi yi' ti ahuanüy. ³⁷Jaybety jadu'n ma Dios ñecy ma jadu'n yminañ:

Tzojc, janch tzojc ymiinañ je huidibi tzonamb tzajpjoty, e ca'p je' jecyñity.

³⁸Jadu'n Dios yminañ:

Pinjaty iich ti ngöbicy co ytudägyjäyity, tzinähuip je' miid ymibijcin. E pen ixtigihua'cp ma ymibijcin, ca' jadu'n njotcujc'adipyich miid je'.

³⁹Ca'p iich ajt njëjity huidibi ixtigihua'cp ma nmibijcin, e ytigoy y'alma, je' iich ajt pin mibijcp, e jadu'n n'alma paadipy nidzoocin.

Yi mibijcin

11 Jotcujc nayjihuiyim jadu'n co huidibi nmibijcin

janch yi', oy co ca' n'ijxim. Je huidibi nmibijcin je' xymooyim jotcujc'ajtin miid huidibi njijp'ijxim ma Dios. Je huidibi nmibijcin nejhuüyim co janch janch jadu'n, oy ca' n'ijxim. ²Com miid co ajt nmij'ap nmijteedy ajcxy mibijci Dios y'ayuc paady Dios cöbijcy ajcxy jadu'n nej tudägyjäy.

³Miid ajt nmibijcin ycixpi nejhuüyim co Dios oyduñ tüg'óciy huidibi jil'ajtp miid y'ayucti'ajty, jigix huidibi cham n'ijxim je' yi' yaj'oyi y huidibi ca' yaj'ixy.

⁴Miid co Abel mibijcy Dios, paady Abel ymoy Dios huindzigi'ñ jac'oybi ca'ydi Caín, e Dios cöbijci Abel yhuindzigi'ñ, e miid je' ycixpi Abel ooy ycömaybidzimy ma Dios co anajty ytudägyity. E jadu'n oy Abel ti yja'o'cini, jadu'n nipaady nej jihuüy yjacmiydägyñi chambaad. Com miid je mibijcin huidibi anajty ymiid yejc ijxpejt ma iich ajt.

⁵Miid co Enoc mibijcy Dios paady yajnicxi jadügpi tzinaydac ni yca'o'cy, ni ca' ajcxy paty, com Dios anajty ti yajnicxyii. Jadu'n yminañ ma yjaybetyity ma Dios ñecy, ca'ni anajty yajnicxyii: "Dios jäygidacpy anajty Enoc chinaayin." ⁶Pen ca' nmiid'ajtim mibijcin ni jadu'nñyi, ca' Dios jäygidägy ajt ndzinaayin. Com co nmihuingonaanim Dios, hue' tzocy co nmibijcin co Dios yjijity, e co yaj'ahuimbidity oybi miid pin mibijcip.

⁷Miid co Noé mibijcy Dios, paady Dios ñimaayi jayijp co ytuna'ñyii yjada'ñyii mijniigom huidibi anajty ca'ni yaj'ixy. Co Dios ymigapxi, chi Noé yjotmaybaady e yaj'oyiy je barco ma yi' etz y'ung y'anäg

ñiigomdzögipy. Miid co anajty Noé miidity mibijcin, paady yajpocycäy je naaxhuiñyjäy ajcxy ca'pi ymibicy. Chi Dios cöbijcy Noé jadu'n nej tudägyjäy miid co mibijci Dios y'ayuc.

⁸Miid co Abraham anajty Dios mibicy, paady Dios yhuin'ijxi e ycapxymidouhui. Chi je' choon ma ñaax ycajpin ñicxy ma je it lugar huidibi Dios anajty möhuaanip co je'adiyb. Chon, ni ca' anajty nejhuiy ma ñicxy. ⁹Miid co Abraham mibijcy Dios, paady chinaydacpijcy nej tüg huingjäy ma je naax huidibi Dios yaj'ahuaniiyi, huidibi ca' yjējity. Chinay ma huittijc, nañ jadu'n ajcxy y'idiich Isaac etz Jacob huidibi ajcxy nañ jadu'n Dios yaj'ahuaniiyi je naax. ¹⁰Abraham je' anajty y'ahuijxyp mina jēbi chinaydacpijcy ma Dios y'it ylugar huidibi jadu'n nipatp nej tüg cajp huidibi miid y'ijx ta'tzpciy y'oyduñity, je huidibi Dios ñihuinmayiyy, je huidibi Dios yajcojy yaj'oyiyyb.

¹¹Sara hue' anajty pumäy, ti anajty ymijäyñi, ti ñajxni tiempo mina jēbi y'ung'ixy. Per miid co mibijcy Dios y'ayuc huidibi ti ñimaayi co y'ung'ixa'ñ anajty, chi paty mijaa co y'ungdzimigip. E chi y'ung'ijxy com ymibijc co Dios anajty cuyduna'ñ tiibi ahuaniiy. ¹²Miid tügpä jäy, je Abraham, ti choondacy tügpicy y'amigügtijc huidibi oy ti ymayiyy. Abraham, oy anajty je' ti yjahuingoni mina y'ögaani, chi ooy y'ung y'anäg, y'ap'ung y'apmang janchmay paty, jadu'n ymayity nej madza' etz ymayity nej pu' ma mejypa', janch ni ycamicho'nity.

¹³Tüg'öciy je jäy ajcxy huidibi ya yajnimiydacp, öctay ajcxy ni ycacidigiyyi je tzinaydac huidibi anajty Dios ti yaj'ahuaniiyi. Miid co ajcxy mibijcy Dios, paady nejhuiyy ajcxy co jacjiini Dios ymöhuiyyb je huidibi ti yaj'ahuaniiyi. Com ymibijc ajcxy Dios, paady jotcuje ñayjihuiyyi co Dios möhua'ñyii jacjiini huidibi ti yaj'ahuaniiyi. Yminañ ajcxy co anajty y'adzinaaygixy ya naaxhuiñ. ¹⁴Pinjaty jadu'n minamb co adzinaaybi ajcxy yajpaady, hue' yajhuimbizimy co chinaydac yjugy'ajttac ajcxy y'ixtaayb. ¹⁵Co ixyipy ajcxy jäymejtzó'cigixy je naax ma anajty ti choongixy, janch ycahuimbijty ajcxy jim jadüg'oc. ¹⁶Per je' ajcxy ñigi anajty nijot'ajtcixy it lugar jac'oybi, je' je' je tzajpjotypi. Miid jada ycixpi Dios ca' yi' cho'yduñ co ñaydijyii Dios ma je' ajcxy. Com ti ni'ixiyyi ajcxy chinaydac jiiby tzajpjoty.

¹⁷Abraham mibijcy Dios, e co Dios Abraham y'ijxmajtzi, chi yajmiin Isaac co anajty yajhuindzigihua'ñ Dios. E janch cixyot je y'ung tügpajc anajty yecy, je y'ung huidibi Dios ti yaj'ahuaniiyi anajty. ¹⁸Dios ñimay Abraham co miid Isaac miid'ada'ñ may y'ap y'oc. ¹⁹Abraham yhuinmaayb anajty ooy co Dios tügpajc cötujcmiidip yajjugypigipy öcpiyi. Paady jēbi iich ajt nminaanim co Abraham ycidigiyyi jadüg'oc y'ung co anajty ti yjugypicy co anajty ti y'ögy.

²⁰Isaac mibijcy Dios, paady Isaac Dios mibijctzoy miid Jacob etz Esau ycixpi co huen ajcxy oybi paadip ma je tiempo huidibi mim

cidacni. ²¹Jacob ymibijcy anajty Dios, paady co anajty y'ögaani, chi ahuaniiy conuucxin ma nidüg nidüg José y'ung y'anäg. E jadu'n Dios ooy huindzigiüy ojadajty yam ñaygodajc'adyii miid ytajc co anajty ooy ti ymijjäyüñi. ²²José co anajty Dios mibicy ma anajty y'ögaani, yminañ co Israel jäy ajcxy anajty ypidzimaangixy comjegy jim Egipto, chi yajhui'my tiy'ajt nej ypajc ytunüyb co anajty choñ ajcxy jim Egipto.

²³Miid co anajty ajcxy mibicy Dios, paady co Moisés yma'xung'ajty, chi ytaj yteedy yützi tugiig po'. Com co ajcxy ijxy co anajty ooy y'oyity je ma'xung, ca' ajcxy anajty tzigiy je rey y'ane'min co anajty yaj'öctähua'ñ tüg'öciy ungma'xung yëydijcpi. ²⁴Miid co Moisés mibijcy Dios, paady co oy ymij'anäccojni, ca' tzojcy co ñaydijüyb co rey ñiix y'ung'adiib. ²⁵Hue! janchtiy Moisés nigi nijot'ajty co ayo'n tzaachypi minaxipy yajnaxipy quipxy miid Dios yjäy, ca'ydi co nixondägipy je jugy'ajtin ma je rey ytijc huidibi Dios ca' jäygidägy. ²⁶Moisés nigi ñayjihuiyi jotucj co tzaachypi ayo'n anajty minaxy yajnaxy miid Cristo yexipi, ca'ydi co miid'ajttähuipy jugy'ajt comeeñ'ajt jim Egipto. Com Moisés ti anajty yhuinma'ñypidägy co Dios yega'ñ je oybi. ²⁷Miid co Moisés mibicy anajty Dios paady choñ jim Egipto, ni catzigiy co anajty rey yjotmädy, jadu'n y'ijty tudägy nej jihuüy ixy je Dios ca'pi yaj'ixy.

²⁸Miid co mibijcy Dios paady Moisés tuuñ je pascuaxii, chi

ni'ane'mdiüy co huen tijc'aguu tüg tüg yajni'pyüy, jigix co je ángel huidibi yaj'öcp, ca'p je' je israelitajäy y'ungoob yaj'o'cipy. ²⁹Miid co ajcxy mibijcy Dios paady je israelitas ajcxy yajnaxxy je tzaptz mejy jadu'n nej jihuüy ñajxcixy huindtztuuy, e co ajcxy je Egipto jäy nañ jadu'n yjanaxa'ñ, cijx ajcxy ñiñ'o'ctäy.

³⁰Miid co ajcxy mibijcy Dios, paady ycidäday je poch ma je Jericógajp, taab anajty je israelitas ajcxy ti jühuidijtcixy huixtujc xii.

³¹Miid co Rahab, je töxyjäy jibic tzinaaybi, mibijcy Dios, paady ca' y'o'cy quipxyi miid je huidibi anajty ca' capxymidoogixy Dios. Com co je' yajjättacy ma ytijcin je huidibi anajty ti choongixy ma Israel jäy ajcxy anajty yajpaady, co anajty ayüch ameech yajcüyögyxxy yajtecyyögyxxy Canaán naaxjot.

³²¿Ti njacmiydägibich?

Nyajtigoy'idaamybich tiempo co nimiydägibich Gedeón, Barac, Sansón, Jefté, David, Samuel, e jacadyii Dios y'ayucnajtzcaxiiybi.

³³⁻³⁴Miid co ajcxy mibijcy Dios, paady ymimadac ajcxy ymidzip canaag picy, ane'my ajcxy yajxon yi cajpjäy, ypaat ajcxy pubejtin huidibi Dios anajty ti yaj'ahuaniiyigixy.

Yaj'adujc ajcxy caa y'ahuac, yajxeem ajcxy jiin huidi anajty ooy ymijity, tzooc ajcxy co anajty yaj'ögaangixy miid espada. Pinjaty anajty pumäyip ypaat je' ajcxy ymic'ajt ymijaa, mij je' ajcxy ooy y'ijtcixni ma chiptungixy, e ymimadactay ajcxy maymidzip.

³⁵Jim anajty töxyjäy yjältigixy huidibi ajcxy cädigiüy y'ung juugy

huidibi anajty ti jugypicy co anajty ti y'ögy. Jadyii ajcxy y'o'cy ahuoni' agidzi', ca'p ajcxy paty nîdzooцин. Jadu'n ajcxy paty o'cin, jaydēbi patcixy jugy'ajtin etz tzinaayim jac'oybi ma Dios. ³⁶Jadyii Dios y'ayucnajtzcaxiiby ooy nîxiici yajxiici, yajc'ajty, etz tzumy mach ypujxtijc'iñāy. ³⁷Jadyii Dios y'ayucnajtzcaxiiby y'o'cy ajcxy tzaagögäch, jadyii yaj'ajidiy ajcxy janch tim cup y'ijxmajtzi ajcxy, jadyii yaj'o'ci miid espada. Ymiñ xyijpy xii yaa yhuidijectixy ymiid ajcxy nînicx yüch miid cöbixy'ac etz miid chivo'ac, ayoob jäy ajcxy, jotmay miid, yajtzaachytungixy yajca'oydungixy. ³⁸Yi jadu'mbi Dios y'ayucnajtzcaxiiby ajcxy ni je naaxhuiñyjäy anajty camihuaadity. Miid ymidzip pahuidijtcixy, paady yhuidijectixy anajty tîtznaaxtuum etz yuugjoty, chinaaygixy naaxpa'tci'py etz majaty ang. ³⁹Nidüg'öciy je' ajcxy oy cömay ajcxy yjanajxy miid co mibijcy ajcxy Dios, ca' ajcxy paty tiibi anajty Dios y'ahuanîy. ⁴⁰Com Dios jac'oybi je' anajty yegamyb miid iich ajt, paady ca' ajcxy paty je oybi tiibi Dios y'ahuanîy. Ti anajty Dios nihuinmayîy co yajca'pxaani yi' ajcxy ytudägy'ajtin quipxyi miid iich ajt co Cristo y'o'cy miid iich ajt nbocy ycixpi.

Tzoc iich ajt nhuinma'ñybidaacim ma Jesús

12 Com nmiid'ajtim canaag iixpejt nej jäy jecy'ajty mibijcy Dios, paady iich ajt jadu'n nipaady nej jihuîy huinduy jajiixci'py nmiid'ajtim jäy huidibi

ti yajniguëxîgy ymibijcin. Paady ycixp tzoc ahuing pidaacim je huidijaty xy'adzijpim ma ajt nmibijcin, e nañ jadu'n tzoc ahuing pidaacim je pocy huidibi xyajhuinma'ñydidgooyim, e tzoc naymic'ijxim cuydunim yi tiy'ajt miid mecxtujcin ma ajt ndzinaayin, jadu'n nej jäy ñaymic'ijxigixy co nayboyicquîpxigixy. ²Tzoc nhuinma'ñybidaacim ma Jesús. Jim iixpejt nbaatim ma Jesús nej jēbi nmibijcin Dios. Jesús yi' je' ti xyajnejhuîyim Dios ytiy'ajt. Yi Jesús yi' y'ayoo anajty ma je cruudz, ni ca' yi' tuñcuendi je jadu'mbi o'cin oymidzo'yduunip. Com co Jesús ñejhuîyb anajty co jadu'n y'oc'ayoohuipy, chi ypaadipy jotcujc'ajtin ma Dios y'ane'my. E cham je' yajpaady ma Dios ymijc ma Dios y'ane'mdac.

³Huinmaaygixy miich ajcxy je Jesús y'ijxpejt, nej pocyjäydjc chaachytuungixy etz ñi'ojiygixy, etz ca' y'ixaani, paady ca' mdzîjpcigixy ni mgamijotmetzcîiygixy. ⁴Ca'ni miich ajcxy ayo'n tzaachypi myajnaxy mabaad ni'py ajcxy mxiibidyii jadu'n nej Cristo yajty. ⁵¿Nej ti miich ajcxy mjäydigooygixy je capxhuijin huidibi Dios ti xymooygixy nej jihuîy yci'm'ung? Jadu'n ymina'ñ ma Dios ñecy:

Miich n'ungich, ca' mbidägy nej jihuîy ca' ytim ytiijty je tzaachypi huidibi Dios miid xycapxhuijy, ni ca' mjotmetzcîihuipy co xyaj'ójiy.

⁶Dios ycapxhuijpy yi' pinjaty chojcpy yjihuiyb. Dios chaachytumby yi' ajcxy co

ytundigooy, pinjaty yi' ti
 cöbicy nej jihuïy yci'm'ung.
⁷Mimadaaccix miich ajcxy je castigo,
 com Dios jadu'n yi' xymiidity ajcxy
 nej jihuïy yci'm'ung. ¿Nej ji jada' tüg
 ung, e ca' yteedy chaachytunhiyb co
 ytundigooy? ⁸Pen ca' miich ajcxy
 Dios ti tzaachypi xymooygixy, jadu'n
 nej yi' moy castigo tüg'óciy y'ungdijc
 y'anäctijc, ca' miich ixipy ajcxy Dios
 xy'ung'adyii tiydudägy. Jadu'n miich
 ajcxy m'idipy nej tüg pi'cl'anäg huidibi
 yteedy ca' y'ixa'ñyii. ⁹Jadüg nax, taabi
 anajty ajt nbi'cnity, iich ajt ndeedy ya
 naaxhuiñ xy'ihiuijim xycapxhuijim
 anajty, e xychaachytuunim co ca'
 ngapxymidoohuim nhuindzigiïyim
 ajcxy. ¿Nej co ca' huaad n'lijtim
 ane'my ma ajt ndeedy huidibi
 tzajpjoty yajpatp? E jadu'n jëbi
 nbaatim je jugy'ajtin huidibi ca'
 ycixipy ytigoyipy nimina. ¹⁰Ich
 ajt ndeedy ya naaxhuiñ xy'ihiuijim
 xycapxhuijim anajty miid jada conbi
 jugy'ajt ycixpi, jadu'n nej je' anajty
 ajcxy oy'ixy. Nañ jadu'n Dios iich ajt
 xychaachytuunim miid ajt n'oy'ajt
 ycixpi etz jigix nmiid'ajtim huädz jot
 huädz huinma'ñ nej Dios ymiidity
 huädz yjot huädz yhuinma'ñ. ¹¹Oy
 yjanchity co ca' ti tzaachypi ndzojcm
 ma yam nbaatim je tzaachypi, com
 ooy ndzachjihuiïyim je tzaachypi, e
 ca' jotcujc nayjihuiïyim. Per pinjaty
 ixpijcpi Dios chojcin miid je tzaachypi
 ycixpi, chi je' yhuimbizimiïygixy tüg
 jugy'ajtin tädägyti etz jotcujcpi.

**Je huidibi ayo'ngojp co Dios
 y'ayuc ngacöbiganim**

¹²Paady miich ajcxy jotmicpijccix
 ma mmibijcin, jadu'n nipaadip
 nej jihuïy myajpidiccixy mgi' tiibi

y'anucxiïyñi, etz mgoxcohuajc
 mic'ajt paady huidibi anajty ca'
 mic'ajt miidity. ¹³Ixtaaygix nii'aa
 tü'aa tiïybi ma mdzinaayin, jadu'n
 nipaadip nej jihuïy yi mdecy
 huidibi mädipti ti chögy, e camina
 jadüg'oc yhuuidip.

¹⁴Tzinaaygix miid oyjot
 oyhuinma'ñ miid nidüg'óciy
 jäy. Ca' mdúngixipy ti tzip.
 Miid'ajtcix tüg tzinaayin huätzpi,
 pen ca' jadu'n mdungixy, ni pin
 ca'ixipy je Huindzin Jesucristo.

¹⁵Ooy cuenditungixp co ni pin
 cajijpyöydüdipti je pubejtin huidibi
 Dios ti ahuanïy, jigix nañ jadu'n
 ni pin ycayajpaadipy janch mät
 yjot yhuinmañ, e yajhuindigoydäy
 yajmättäy jacjadyi ymügütiïjc, tim
 jadu'n nej tüg ujtz ta'mbi ypa'mduñ.

¹⁶Ni tüg miich ajcxy ca' huaad ti
 ayuc miid'aty miid huingbi töxyjäy
 huidibi ca' miich mdöxyijc'adyii.
 Ca' nañ jadu'n m'ixtiïjpy je ayuc
 huidibi Dios yajhui'my miid miich
 ajcxy ycixpi, jadu'n nej y'idiich
 Esaú. Miid tüg caayin uucin
 Esaú toocnax je huidibi anajty
 möhuaanip yteedy co y'unggoobity.

¹⁷Miich ajcxy mnejhuiïyb co Esaú
 tocy huidi anajty paatip co japada'ñ
 je conuucxin huidibi anajty
 yteedy möhuaanip, ca' jadu'n Dios
 cöbijcy, chi Esaú ooy yjayaaxni,
 per ca' anajty ñihuinma'ñ nej
 yjothuimbidipti miid je' ycixpi tiibi
 anajty tuñ.

¹⁸Ca' miich ajcxy ti mjaty ti m'ixy,
 nej jecy'ajty yi israelitas ajcxy yjaty
 etz y'ixy co ajcxy mihuingoñ je
 cop Siná ma anajty Dios ti pidägy
 mij jiin, ma anajty ooy yhuidzucy
 yjidity etz mijpoj mjiïtigoy ñaxy, ma

anajty ooy y'agoodziy anaxy. ¹⁹Ni mgamidoy ajcxy je trompeta ni je Dios y'ayuc huidibi anajty ajcxy je' migapxip. Pinjaty je' midou je ayuc ypijctzou ajcxy may'ajt co ca' huaad yjacmigápxigixy com ooy anajty chigiigixy.

²⁰Je' je' anajty ycixpi co anajty ca' mimadägaangixy je ane'min cötujcin huidibi anajty minamb: "Pin anajty ytecy pidacp ma yi cop, hue' yi' y'oyyaj'o'cnity cögäch miid tzaa o miid quipyijpxu'ñ, oy ixypy y'iyujcity." ²¹Oy chigiinyi huidibi anajty yaj'ijxp, Moisés ci'm minaan: "Tziyuuybich yam miid tzig'i'ñ."

²²Per miich ajcxy jadu'n nipaady nej jihuüy ti mmihuingoongixy yi cop huidibi yxii Siön etz je Dios juugypi ycajp. Je' je' je Jerusalén tzajpjotypi ma canaag mil je ángeles ajcxy yöymujccixy. ²³Ti miich ajcxy mmihuingoongixy ma ti yöymujccixy je jaccömaaybi jäy huidibi ajcxy yxii cojaay ma Dios ñecy jiiby tzajpjoty, je huidibi ajcxy huin'iiib huingapxtacp Dios. Ti miich ajcxy mihuingoongixy Dios je huidibi nijuez'ajtp tüg'óciy. Nañ jadu'n ti miich ajcxy mihuingoongixy je' ajcxy je oyjäydijc y'espíritu huidibi Dios ti yaj'ahuimbijttäy tudägy. ²⁴Miich ajcxy ti mihuigoñ yi Jesús, yi huidibi xycodinaayim ma Dios miid je jemybi cötujcin huidibi Dios yajhui'my miid iich ajt ycixpi. Yi Jesús huidibi mic'ajtmoy je Dios y'ayuc jemybi, co ñi'py teemy yojcy miid ajt nbocy ycixpi. Yi Jesús co ci'm ñi'py teemy yojcy miid jäy ajcxy ypocy ycixpi, nigi oy yi' ca'ydi co Abel iyujc ñi'py teemy yojcy miid ypocy ycixpi.

²⁵Paady ycixp ooy cuenditungix miich ajcxy, ca'ydi yaj'ixtijy Dios, je pin ti xyajmihui'mim jemybi y'ayuc. Je jäy ajcxy huidibi tzinay jecy'ajty, ca'p je' ajcxy chocy co ajcxy ixtijy Dios co jecy'ajty yjamigapxi ajcxy ya naaxhuiñ. O'ctíy iich ajt ca' ndzoocim, pen nmooyim ajt njiix je Dios, je pin y'ayuc xyajmihui'mim huidi tzoon tzajpjoty.

²⁶Co Dios y'ayuc yecy jecy'ajty, chi yajtziyuuy ooy naax. Jadachambi Dios ymina'ñ: "Jadügtecypajc nyajtziyuya'ñich je naax, e ca' nminaanim naaxti'ajty, nañ jadu'n nyajtziyuya'ñich je tzajp." ²⁷Co jadu'n Dios ymina'ñ: "Jadügtecypajc nyajtziyuya'ñich je naax." Hue' yajhuinjihuüy co ytigoydähuipy huidijaty yücxp huidibi Dios yaj'oyiiy, e je' hui'mip je huidijaty ca' yu'cxy. ²⁸Paady je Jesucristo ycötujcin huidibi Dios xyajmihui'mim, ca' yi' huaad ytigoy. Tzoc yajnaxim Dioscojuyip miid Jesús y'ayuc ycixpi, e nyajmij'ajtim n'ojadajtim Dios miid tudägy'ajt etz miid huindzigi'ñ nej je' jäygidägyin. ²⁹Iich ajt nDios jadu'n yi' nej tüg jiin huidibi nöctaayb tüg'óciy.

Nej jëbi nyajjäygidaacim Dios

13 Miich ajcxy huidibi mibijcp Jesucristo, ca' mjäydigooygixy co ajcxy mnaychójcigixipy miñ xyipy nej jihuüy ajcxy mdügquëxyity. ²Ca' ajcxy mjäydigóoygixipy co oyjäy'ajtin mdúngixipy miid pinjaty ajcxy xycojädiyb. Miid co oyjäy'ajtin ajcxy tuuñ, chi nijëjity ajcxy yajjättacy ángeles ajcxy, ni ca' ajcxy huinjihuüy co ángeles anajty ti yajjättaaccixy.

³Mjäymedzip ajcxy pinjaty tzumy'iñaayb mach'iñaayb jadu'n nej jihuiy miich ajcxy nañ jadu'n mdzumy'iñaaygixy mmach'iñaaygixy quipxy miid je' ajcxy. Jäymedzip miich ajcxy pinjaty tzaachypi ayo'n minajxp yajnajxp, com nañ jadu'n miich ajcxy miidity je ninicx huidibi jëbi y'ayoy.

⁴Huen nidüg'óciy jäy huindzigiigixy yajmij'ajtcixy je pijcin casada'ajtin. Huen je yëydijc etz je ytöxyijc naymiidtzináyigixy yajxon, com Dios yi' tzaachytunipy pinjaty tundigooyb miid huingbi töxyjäy.

⁵Ca' m'adzojccixy meen. Mijotcujc'ajtcixy ti ajcxy ii miid. Dios ti je' ymina'n: "Camina xii iich miich ajcxy n'ixmadzipy, ni iich miich ajcxy ngajäydigoyipy."

⁶Jadu'n jëbi nminaanim agujc jotcujc: "Yi Huindzin Dios yi' xypubejtpich, ca' ndzigihua'nich jäy nej xyjatuna'nich."

⁷Jäymejtcix miich ajcxy je pinjaty ti xyñigohuajc'ajtcixy, je pinjaty ti xyajmiidmiydaaccixy Dios y'ayuc ytiy'ajt. Huinmaaygix nej je' ajcxy anajty ytudägy'aty, padungix nej je' anajty ajcxy miidity ymibijcin.

⁸Jadu'n nej Jesucristo oybi tuñ jecy'ajty, nañ tim jadu'n oybi tuñ chambaad, etz oybi tuna'n huinixii huinitioempo, ca' yi' yajtigadzip yi yhuinma'n ni mina. ⁹Ca' miich ajcxy myajhuin'iingixy miid canaag ixpijcin huidibi ca' ytügnaxity miid Jesucristo ytiy'ajt. Nigi oy co ajt nbidaacim nhuinma'n ma je Dios y'ayuc, nej yi' xychojcim

xyjihuiyim, nej yi' may'ajt tuñ miid iich ajt. Ca' mbidaacim mhuinma'n ma je cötujcin huidibi adujcp nijëjity caayin uucin. Ni ti jotcujc'ajt ajcxy capaty pinjaty panixp yi jadu'mbi cötujcin.

¹⁰Je judío tungmiidpi huidibi huindzigi'n tumb anajty ma Dios yhuittijc je jecyip, ca' yi' jëbi yjactuuni ma iich ajt nmibijcin jadu'n nej Jesucristo tuñ huindzigi'n miid iich ajt ycixpi.

¹¹Je judío mijtungmiidpi ma Dios ytiyc ypidac iyujc ñi'py ma je Lugar Santísimo nej tüg huindzigi'n huidibi yajpocyñihuaatzp je mayjäy. Je iyujc ögy ñinicx jiguem je' yajnögy, ca' jiibyity cajpjoty ma je Dios anajty huindzigiigixy.

¹²Tim jadu'n nej je judío sacerdote yajnögy je huindzigi'n iyujc ñinicx cajp nínaxy, nañ tim jadu'n Jesús paty tzaachy'o'cin cajp nínaxy jigix miid je' yci'mni'py pocyñihuadzip je mayjäy. ¹³Tzoc mijpidaacim je Jesús tiibi y'ögy cajp nínaxy miid iich ajt nbocy ycixpi. Tzoc minajxim yajnajxim je canayyajmij'adii je canay'ixa'nii, tim jadu'n nej Jesús minajx yajnajx je canayyajmij'adii je canay'ixa'nii.

¹⁴Ya naaxhuiñ ca' ya ajt nmiidity tüg ciudad ma jëbi n'ijtim huinixii huinitioempo, je' iich ajt njijp'ijxim je tzinaayin huidibi miimb cidaacp.

¹⁵Paady ycixp chojcpy co Dios n'ojadajtim nmibijctzoohuim jabom jabom huinixii miid Jesucristo yxii. Co jadu'n n'ojadajtim nmibijctzoohuim Dios jadu'n nipaady nej tüg huindzigi'n nmooyim. Tzoc ii mibijctzoohuim, tzoc ojadajtim miid ajt ngi'm'ahuac

ngi'm'ayuc. ¹⁶Ca' mjäydidgöoygixipy co oybi mdúngixipy etz naybubéjtigix naybudigíiyigix miñ xyipy. Co jadu'n mdúngixipy jadu'n nipaady nej tüg huindzigi'ñ ti myejccixy ma Dios huidibi yi' ooy jäygidägy.

¹⁷Capxymidoogix pinjaty xyñigohuajc'ajtcixp etz yajmij'ajtcixp, com yi' miich ajcxy xycuend'ajtp yi' m'alma. Nejhuuiyim co ciyegaangixy ycuendi ma Dios nej ajcxy ti xycuend'aty. Pen oybi miich ajcxy mdumyb miid yi' ajcxy, jotcuje ajcxy ñayjihuihuiyb. Pen jibic miich ajcxy mduñ miid yi' ajcxy, tajp mayip ajcxy. E pen yi' ajcxy tajp maayb, chi miich ajcxy ca' ni ti jotcuje'ajt mmiid'adipy.

¹⁸Mibijctzoogix Dios miid iich ycixpi etz je pinjaty xymiidhuidijtpich. Jatytim naymic'íjxibich tudägy nduunich ma tüg'óciy iich ndung, paady ycixp jotcuje nayjihuiyijich.

¹⁹May'ajt nbijctzooybich ma miich ajcxy co Dios mmibijctzoogix miid iich ycixpi, jigix Dios a'ixihuipy co nfcxibich tzoje ma miich ajcxy.

Oy'ajt etz capxpooocxin huidibi cogixiiñip je necy

²⁰Dios nmibijctzooybich miid miich ajcxy ycixpi. Je Dios huidibi yajjugypijc jadüg'oc iich ajt nHuindzin Jesucristo co y'o'cy, je huidibi cuend'ajtp je

maymibijcpidijc. Co Jesucristo ñi'py teemy yojcy, chi mic'ajt moy je jemybi cötujcin huidibi Dios ti xyajmihui'mim. Dios ti pidägy Jesucristo jadu'n nej je cuend'ajtpi jac'oybi ma je maymibijcpidijc. Jadu'n yi' nipaady nej tüg cöbixy cuend'ajtpi huidibi cuend'ajtp may ngöbixy. ²¹Je Dios huidibi xyajjotcuje'ajtim je' huen xyaj'ahuimbijtcixy huädz etz oyjäy ma tüg'óciy ajcxy mmibijcin etz ma tüg'óciy ajcxy mdzinaayin, jigix ajcxy mdunipy nej yi' tzocy. Dios huen tuñ ma iich ajt njot nhuinma'ñ miid Cristo ymic'ajt nej yi' tzocy. iHuen Cristo y'idipy mij cömay huinixii huinitiempo! Amén. Jadu'n jada.

²²Nmigügtijc, nbijctzooybich may'ajt yajtungixy mecxtujcin ma jada ayuc capxhuijin. Ti ajcxy ii con nijayiygixy. ²³Nejhuiygix miich ajcxy co ajt nmigüg Timoteo y'ity ahuätztuum. Pen tzoje yjädy ya ma nyajpaadyich, chi yi' xymiidnfcxibich co iich anajty miich ajcxy nicxy n'ijxcixy.

²⁴Nguejpxyich ngapxpooocxin ma nidüg'óciy pin ajcxy xyñigohuajc'ajtp etz je migügtijc ajcxy huidibi mibijccixyp. Je migügtijc huidibi ajcxy yajpatp ya Italia yquejxyp ajcxy capxpooocxin ma miich ajcxy.

²⁵Dios ajcxy xyconuucxip nidüg'óciy miich ajcxy. Amén. Jadu'n jada.